



REPUBLIKA E KOSOVËS

KUVENDI I KOMUNËS-VUSHTRRI

PROCESVERBAL
NGA MBLEDHJA E JASHTËZAKONSHME E KUVENDIT TË KOMUNËS SË
VUSHTRRISË, MBAJTUR MË 31 JANAR 2022

Mbledhja është mbajtur në sallën e Kuvendit të Komunës së Vushtrrisë, duke filluar në orën 10:15.

Në këtë mbledhje ishin të pranishëm anëtarët e Kuvendit të Komunës së Vushtrrisë:

Adnan Lahu, Agim Bregaj, Agron Përçuku, Alban Bajrami, Ali Januzi, Arlind Gogolli, Behar Duraku, Bekim Zabërgja, Blerina Shala, Bujar Pllana, Edona Gashi, Fakete Dushi, Fatmire Cecelia, Faton Hyseni, Galip Audiu, Gresa Muli, Ilmi Azemi, Kushtrim Hyseni, Leonora Gërguri, Lorik Maxhuni, Mek Selaci, Melihate Basholli-Latifi, Mensur Kasumi, Mensur Kastrati, Mentor Hasani, Nasuf Aliu, Nuri Halili, Nurten Çerkezi-Gjyshinca, Refik Maloku, Shkelzen Xhaferi, Spasoje Stefanoviq, Sylejman Mehulli, Ymer Haradinaj dhe Zojë Hajrizi.

Mungoi: Gentiana Rama.

Mbledhjen e hapi dhe e kryesoi Melihate Basholli-Latifi, – kryesuese e kuvendit, e cila konstatoi se në sallë janë prezent 34 anëtarë të kuvendit, kuorum ky i mjaftueshëm për zhvillimin e punimeve të mbledhjes plenare dhe për marrje të vendimeve të plotfuqishme, andaj procedoi me rendin e ditës.

Të pranishëm në këtë mbledhje ishin edhe Kryetari i komunës, z. Ferit Idrizi, nënkryetari i komunës z. Shpëtim Zhegrova, përfaqësuesi i KFOR-it, përfaqësuesi i OSBE-së, përfaqësues të mediave të shkruara dhe elektronike, përfaqësues të shoqërisë civile.

Në fillim të mbledhjes kuvendi nderoi me një minutë heshtje veprimtarin dhe ish-drejtorin e Drejtorisë për Ekonomi, Bujqësi, Pylltari dhe Zhvillim Rural, të ndjerin Miran Halili. Po ashtu u nderuan edhe luftëtarët e lirisë, heronjtë e Kosovës Zahir Pajaziti, Edmon Hoxha dhe Hakif Zejnullahu.

Adnan Lahu, anëtar i kuvendit - në fillim të mbledhjes duke ju adresuar kuvendit theksoi se: për disa herë gjatë prononcimeve të kryetarit të komunës po i njofton qytetarët e Vushtrrisë se e keni marr udhëheqjen e Komunës së Vushtrrisë me një borxh të trashëguar rreth 6 milionë euro, dhe këtë thujse në çdo prononcim të juanin. Kryetar për hir të qytetarëve, të cilët po na dëgjojnë dua t'ju njoftoj që kjo shifër dhe ky borxh i pretenduar nuk është real.

Detyrimet kontingjente janë detyrime, të cilat mund t'i krijohen komunës nga kontestet gjyqësore që komuna i ka me palët e tjera. Gjithashtu ju njoftoj që detyrimet kontingjente në komunën tonë

ishin afër 3 milionë € kur Lidhja Demokratike e Kosovës erdhi në pushtet në Vushtrri. Gjatë katër viteve të fundit këto detyrime janë zvogëluar për afër 2 milionë euro që janë paguar për kontratën kolektive dhe shujtat e mësimdhënësve. Prandaj kryetar sa i përket detyrimeve kontingjente ju ftoj që të publikoni dokumentet, kontestet që Komuna e Vushtrrisë i ka në gjykatë me palë të tjera dhe të shihet që këto detyrime janë qysh prej kohës kur Vushtrria udhëhiqej nga Partia Demokratike e Kosovës. Gjithashtu obligimet kontraktuale nuk janë borxhe kryetar, janë kontrata që qeverisjet lokale i lidhin me operatorë ekonomik për periudhën dy (2) deri në trivjeçare (3), pra janë kontrata të nënshkruara që komuna jonë duhet t'i mbulojë nga buxheti i vitit vijues dhe nuk janë borxhe. Andaj kryetar ju lutem që të mos e keqinformoni opinionin publik. Në anën tjetër kryetar, në mesin e shumë premtimeve që ju i keni dhënë qytetarëve të Vushtrrisë janë edhe 55 premtimet e juaja të cilat keni premtuar që do t'i realizoni në 55 ditëshin e parë. Sot jemi në ditën e 56 nga marrja e pushtetit nga ana juaj kryetar, a ka mundësi të na njoftoni se a janë realizuar këto premtime të juaja për këtë 55 ditëshin e parë, në mesin e tyre : 10. Trajtimi i problemit me qentë endacakë; 12. Takim me të gjitha shoqatat kompetente për t'u dakorduar për hapjen e zyrës për promovimin e turizmit malor; 16. Zgjedhja e problemit të ndriçimit në fshatra; 21. Pastrimi dhe rregullimi i shtretërve të lumenjve. 22; Rikonstruimi i parkut të qytetit; 41. Takimi me përfaqësuesit e fshatrave për vendosjen e gypit kryesor të kanalizimit përgjatë lumit "Silnica"; 46. Pajisja e zjarrfikësve me veshje dhe mjete moderne; 47. Shndërrimi i Hamamit në galeri të arteve, e kështu me radhë. Kryetar nëse keni realizuar ndonjërin nga 55 premtimet për 55 ditët e para a mund të na tregoni se cilat janë ato premtime të realizuara.

Sylejman Mehulli, anëtar i kuvendit - pasi i përshëndeti të pranishmit, kërkoi informacione nga ana e kryetarit të komunës sa i përket realizimit të premtimeve në 55 ditët e para qeverisëse, kësisoj në ditën e shtatë (7) –nisma për themelimin e zyrës për hartimin e projekteve, në ditën e 10 fillimi i trajtimit të problemit me qentë endacakë, në ditën e 11 takimi me institucionet përgjegjëse për hartimin e kalendarit turistik, nëse një punë e tillë është kryer, atëherë si grup kuvendar kërkojmë që ai kalendar t'u dërgohet ashtu siç janë të informuar, në ditën 12 takimi me të gjitha shoqatat kompetente për t'u dakorduar për hapjen e zyrës për promovimin e turizmit malor, nëse është hapur kjo zyrë të bëhet i ditur vendi i asaj zyre dhe funksionimi i saj, në ditën e 13 fillimi i realizimit të mbulimit të normës së interesit për stimulimin e bizneseve në shumën deri në 20,000.00 €, në ditën e 16 do të fillojë zgjidhja e problemit të ndriçimit në qytet dhe fshatra, në ditën e 17 organizimi i takimit me kompanitë për rregullimin e trafikut urban, kërkoi të bëhen të ditura se cila prej këtyre kompanive ka pasur takim kryetari i komunës, në ditën 19 fillimi i rikthimit të bufeve nëpër shkolla, në cilat shkolla janë hapur këto bufe, në ditën e 20 rregullimi i ndriçimit dhe ulëseve tek shëtitorja "Enver Zymberi", në ditën 21 fillimi i rregullimit dhe pastrimit të shtretërve të lumenjve, në ditën 22 fillimi i rikonstruktimit të parkut të qytetit, vendosja e detektorëve në drunj, në ditën 24 fillimi i implementimit të planit për financimin e bizneseve individuale me shumat 2000-4000 dhe 10,000.00 €, në ditën e 26 fillimi i implementimit të planit për pajisjen e laboratorëve me pajisje për shkollat profesionale, në ditën e 28 fillimi digjitalizimit të gjitha qendrave të mjekësisë familjare dhe ambulancave, në ditën 29 fillimi i reformimit të sektorit të shëndetit oral, në ditën 30 avancimi i sektorit diagnostik në shëndetin primar, ku shihet se në këtë segment kemi një disavancim, ku prej 19 parametrave kemi ra në 2 parametra diagnostik, takimi me përfaqësuesit e familjeve të pastreha për ndërtimin e banesave për banim social, që është një projekt shumë i qëlluar, por kërkoj të bëhet e ditur se a është i inkorporuar në buxhetin për vitin 2022. Për të gjitha këto tema, kërkoi si grup kuvendar t'u ofrohet një raport për realizimin e këtyre punëve dhe projekteve, përtej kësaj ngriti çështjen e vijueshmërisë së mjekut në ambulancën mjekësore në

fshatin Oshlan, çështje kjo e propaganduar se sukses dhe mbajtje e premtimit gjë kjo e cila nuk është e vërtetë, sepse mjeku edhe më herët ka shërbyer atje, për më shumë për të qenë ndryshe kjo çështje, ai kërkoi të publikohet kopja e protokollit e të njëjtës ambulante, ku njerëzit dhe mjekët janë dëshmitarë të gjallë që kanë shërbyer atje. Në të kundërtën nëse vërtetohet e kundërta se mjekët nuk kanë shkuar atje, kërkoi nga menaxhmenti që të ndërmerren masa ndaj atyre mjekëve.

Ferit Idrizi, Kryetar i komunës - pasi përshëndeti të pranishmit, njoftoi se ashtu si ka premtuar në fushatën zgjedhore, për projektet për 55 ditët e para qeverisëse ashtu edhe është duke i realizuar takimet me përgjegjësit që lidhen me domenin e kompetencave në realizimin e atyre projekteve të premtuara. Nëse lexohet në detaje plani del se p.sh në ditën e parë është planifikuar fillimi i skanimit të gjendjes sa i përket furnizimit me ujë të pijes dhe instalimit të rrjetit të ujës-jellësit, lidhur me këtë çështje ai ka mbajtur tri takime dhe kështu kemi filluar të merremi me zgjidhjen e këtij problemi. Në këtë kontekst është themeluar një grup punues i cili ka hartuar një raport, ku është konstatuar se në disa fshatra për shkak të mungesës së shtypjes së ujit nuk shkon uji dhe këtu mendohet të bëhet një zgjidhje tjetër. Lidhur me problemin e qenve endacakë, është kontaktuar një kompani nga Zvicra, ku do të vazhdohet kontrata për trajtimin e qeneve endacakë. Tutje shtoi se ka pasur takim me bizneset, taksit dhe është duke ju përmbajtur me përpikëri planit. Sa i përket deklaramëve për borxhet, shtoi se koha do të dëshmojë se ai ka pasur të drejtë, dhe për këtë parashtrori shembull me depon e patates, i cili projekt është dashur të përmbyllet në muajin korrik 2021, ku komuna ka pagur mjete financiare për këtë projekt, ndërsa ai projekt nuk është realizuar kurrë, dhe rasti tjetër është rruga Vushtrri-Nadakoc-Pestovë, por ka edhe tjera projekte ku komuna ka borxhe, ndërsa projektet nuk janë realizuar. Sa i përket mjekut në fshatin Oshlan ai e siguroi këshilltarin e kuvendit se mjeku në këtë fshat nuk ka vijuar në punë dy herë në javë ashtu siç e ka pasur për obligim.

Ymer Haradinaj, anëtar i kuvendit - tha se pasi që Kopshti "Foleja" është mbyllur si rezultat i masave anti-covid-19, kërkoi që prindërit, fëmijët e të cilëve vijnë në këtë kopsht të lirohen nga pagesa e taksës për këto shërbime, për muajin shkurt. Pastaj ngriti çështjen e mospërfilljes së vendimit të MASHT-it, nga ana e menaxhmentit të shkollës "Andon.Zako.Çajupi", për kompensimin e orëve të humbura si rezultat i vonësës së fillimit të vitit shkollor, shkollë kjo e cila ka hartuar një plan vetanak për kompensimin e orëve që bie ndesh me vendimin e ministrisë. Mandej çështja e shpalljes së një tenderi nga komuna në muajin tetor për asfaltimin e shtatë rrugëve në fshatin Stanoc i Epërm e që përfitues i këtij tenderi është "Bageri Kompani" nga vizita në terren del se vetëm katër rrugë janë asfaltuar, andaj lidhur me këtë pyeti qeverinë komunale se cilët do të jenë hapat e mëtejme lidhur me këtë çështje, dhe cilat janë veprimet ligjore që do të ndërmerren.

Shpëtim Zhegrova, nënkryetar i komunës - propozoi që në rend të ditës të futet edhe pika për lirimin nga pagesa e taksës për çerdhet publike për prindërit, fëmijët e të cilëve marrin shërbime në këto çerdhe.

Adnan Lahu, anëtar i kuvendit - lidhur me rendin e ditës vlerësoi se kemi të paktën pesë pika të cilat nuk kanë kaluar fare në Komitetin për Politikë dhe Financa dhe shtoi se nga praktika e kaluar, procedimi i pikave në kuvend pa kaluar në filtrin e KPF-së është bërë kur temat kanë pasur ndonjë urgjencë, ndërsa pikat që ne sot i kemi para vetes nuk janë të natyrës urgjente, andaj kërkoi sqarime se përse të njëjtat janë procedura.

Sylejman Mehulli, anëtar i kuvendit - vlerësoi se është i çuditshëm fakti se qysh në seancën e parë të procedohen materiale pa kaluar në KPF dhe ceku se me një pajtueshmëri me të gjithë këto pika mund të largohen nga rendi i ditës pasi që të njëjtat nuk kanë ndonjë urgjencë.

Ilmi Azemi, anëtar i kuvendit - tha se është e vërtetë se disa prej pikave të rendit të ditës nuk kanë kaluar në filtrin e KPF-së, por se të gjitha këto tema janë të natyrës urgjente siç është formimi

i komisioneve për ndërmarrjet publike, Komiteti për Komunitete, por edhe nisma për ndryshimin dhe plotësimin e statutit të komunës, janë të natyrës urgjente, sepse kanë ndryshuar rrethanat dhe legjislacioni dhe ka nevojë që të plotësohet ky statut.

Ferit Idrizi, Kryetar i komunës - duke arsyetuar rendin e ditës, vlerësoi se është në dorën e kuvendit që të vendos për procedimin e pikave të rendit të ditës apo jo, por nëse i analizojmë pikat një nga një del se të gjitha e kanë rëndësinë, peshën dhe urgjencën e vet, andaj i sugjeroi anëtarëve të kuvendit që në mënyrë të lirë të vendosin nëse dëshirojnë që të procedohen apo jo. Në vazhdim ai arsyetoi secilën pikë një nga një duke gjykuar se të gjitha pikat kanë urgjencën e tyre sikur është ajo për themelimin e komisionit për intervistimin e drejtorëve të shkollave.

Adnan Lahu, anëtar i kuvendit - përsëriti se nuk është mirë të bëhet praktikë që pikat të sillen në kuvend pa kaluar në Komitetin për Politikë dhe Financa, dhe i sugjeroi kryesueses së kuvendit që herëve tjera mos ta lejoj këtë gjë.

Në fund të debatit jashtë rendit të ditës, kuvendi pas votimit me vota “unanime” aprovoi këtë:

R E N D I T E

1. Shqyrtimi dhe aprovimi i procesverbalit nga mbledhja inauguruese e Kuvendit të Komunës së Vushtrrisë, mbajtur më datë 6.12.2021;
2. Shqyrtimi dhe aprovimi i procesverbalit nga mbledhja e jashtëzakonshme e Kuvendit të Komunës së Vushtrrisë, mbajtur më datë 14.1.2022;
3. Shqyrtimi i Raportit për të hyrat dhe shpenzimet buxhetore për periudhën janar – dhjetor 2021;
4. Shqyrtimi i Draft – Planit të Punës i Kuvendit të Komunës për vitin 2022;
5. Shqyrtimi i Draft – Planit të Punës i Kryetarit të Komunës për vitin 2022;
6. Shqyrtimi i propozim – buxhetit për vitin 2022;
7. Shqyrtimi i propozim – vendimit për themelimin e Komitetit për Komunitete;
8. Shqyrtimi i propozim – vendimit për themelimin e Këshillit Komunal për Siguri në Bashkësi;
9. Shqyrtimi i propozim – vendimit për emërimin e Komisionit komunal të aksionarëve në KRM “Uniteti” Mitrovicë SH.A, njësia në Vushtri;
10. Shqyrtimi i propozim – vendimit për emërimin e Komisionit komunal të aksionarëve në NPL “Përparimi” SH.A, në Vushtri;
11. Shqyrtimi i propozim – vendimit për themelimin të Komisionit përzgjedhës për zgjedhjen e drejtorëve dhe zëvendësdrejtorëve në institucionet edukativo arsimore dhe aftësuese parauniversitare në Komunën e Vushtrrisë;
12. Shqyrtimi i kërkesës të Kryetarit të komunës për miratimin e nismës për ndryshimin dhe plotësimin e Statutit të komunës;
13. Shqyrtimi dhe miratimi i vendimit për formimin e Komisionit për përgatitje të draftit të Statutit të komunës për ndryshim dhe plotësim të Statutit të komunës;
14. Shqyrtimi i peticionit të ish-banorëve të fshatit Skoçan për përfshirje në buxhetin e vitit 2022, asfaltimi i rrugës që lidh fshatin Skoçan me Vushtrrinë.
15. Shqyrtimi i propozim-vendimit për lirim nga pagesa e taksës për shërbimet e çerdheve publike në Komunën e Vushtrrisë;
16. Shqyrtimi dhe aprovimi i deklaratës për mbështetjen e profesorit Lulizim Paci.

1. Shqyrtimi dhe aprovimi i procesverbalit nga mbledhja inauguruese e Kuvendit të Komunës së Vushtrrisë, mbajtur më datë 6.12.2021

Pas shqyrtimit të kësaj pike të rendit të ditës, Kuvendi me vota “unanime” aprovoi procesverbalin nga mbledhja inauguruese e Kuvendit të Komunës së Vushtrrisë, mbajtur më datë 6.12.2021.

2. Shqyrtimi dhe aprovimi i procesverbalit nga mbledhja jashtëzakonshme e Kuvendit të Komunës së Vushtrrisë, mbajtur më datë 14.1.2022

Adnan Lahu, anëtar i kuvendit - kërkoj që të bëhet korrigjimi i procesverbalit në faqen nr.5 ku thuhet: Adnan Lahu, anëtar i kuvendit të shtohet fjalia në emër të LDK-së, ndërsa tek Behar Duraku të mbetet vetëm anëtar i kuvendit.

Pas shqyrtimit të kësaj pike të rendit të ditës, Kuvendi me vota “unanime” aprovoi procesverbalin nga mbledhja jashtëzakonshme e Kuvendit të Komunës së Vushtrrisë, mbajtur më datë 14.1.2022, me korrigjimin e lartshënuar.

3. Shqyrtimi i Raportit për të hyrat dhe shpenzimet buxhetore për periudhën janar – dhjetor 2021

Nasuf Aliu, anëtar i kuvendit - tha se në analizë pak më të thellë del se raporti ka disa gabime, fillimisht në titull të raportit thuhet raport tremujor janar-dhjetor, d.m.th është raport vjetor e jo raport tremujor. Tutje shtoi se në raport evidentohet një shpërputhje mes planifikimit dhe realizimit të të hyrave, andaj shihet se kemi një planifikim joprofesional, sepse është alogjike të planifikohen 12, 000.00, ndërsa të teprojnë 15.000.00 €. Tutje shtoi se kemi rritje drastike të shpenzimeve sa i përket drekave zyrtare nga viti 2020 në vitin 2021, dhe kjo a ka ndodhur për shkak të fushatës zgjedhore apo për çfarë arsye. Derisa në vitin 2020 për dreka zyrtare kishim të shpenzuara 17,065.30 €, në vitin 2021 kemi një rritje prej 31,183.68 €. Lidhur me borxhin qeveritar në vlerën prej 24, 730.092 €, pyeti se për çfarë borxhi bëhet fjalë.

Adnan Lahu, anëtar i kuvendit - tha se raportin të cilin e kemi përpara është një raport i hartuar në mënyrë joprofesionale, në raport mungojnë komentet për secilën fushë dhe kod ekonomik. Sa i përket shpenzimeve për furnizim me dru nëpër shkolla, ku kemi një diskrepancë ndër vite, ku në vitin 2020 kemi pasur të shpenzuara 47,000.00 €, ndërsa në vitin 2021 kemi 190,000.00 €, ky dallim ka ndodhur për faktin se në vitin 2020 kishte dështuar tenderi për furnizim me dru, ndërsa pagesa për furnizim me dru është bërë në vitin 2021 për vitin 2020. Sa i përket referimit në një borxh qeveritar sqaroi se bëhet fjalë për një borxh ndaj Komisionit Evropian, më saktësisht për fabrikën e riciklimit në fshatin Bukosh, por ky borxh ka qenë shumë herët në emër të komunës.

Ilmi Azemi, anëtar i kuvendit - duke ju referuar parafolësve, vlerësoi se sa i përket emërtimit të raportit si raport tremujor, këtë kritikë e kishin bërë edhe në kohën kur Nasuf Aliu ishte kryesues, por asnjëherë nuk ishte përmirësuar. Tutje shtoi se në raport evidentohen disa shqetësime të cilat nuk e di se si do të mund t'i arsyetojmë edhe para vetes e edhe para qytetarëve. Pastaj ceku se tek të hyrat e realizuara kodi 660, kemi një performancë shumë të lartë, ku bëhet fjalë për lejet ndërtimore ku realizimi është 533,178.24 €, pastaj lejet mjedisore 63,989.72 €, por çka është më e mirë është se kemi një vlerë të lartë sa i përket legalizimit të objekteve 18,365.90 €, por në këtë pozicion ai i ka dyshimet e tij dhe për këtë kërkoj përgjigje me shkrim se për çfarë legalizimi të

objekteve bëhet fjalë, për ato të vjetra apo për cilat objekte. Pastaj tek përmbledhja e shpenzimeve sipas burimit të financimit, kemi një suficit prej 2, 563.588.99 € që tregon një performancë jo të mirë të shpenzimit të buxhetit dhe të menaxhimit të parasë publike. Mandej është interesante që tek përmbledhja e shpenzimeve sipas kategorisë së lartë të shpenzimeve, kodi 111 kategoria paga dhe mëditje, pyeti se si është e mundur që realizimi të jetë 100 %, kjo është shqetësuese nëse vetëm paraqiten shifra sa për të plotësuar dëshira, sepse vlera prej 10, 603. 183.40 € në tërësi është shpenzuar dhe kjo as teorikisht nuk është e mundur, e lëre më kur ia shtojmë faktin se disa vende pune janë vakante si rezultat i pamundësie së zhvillimit të procedurave të rekrutimit. Tek mallrat dhe shërbimet kodi ekonomik 14410, vendimet e gjykatave për vitin 2020 paraqiten 717,648.07 €, ndërsa në vitin 2021 vetëm 7,271.64 €, për këtë jemi në dijeni se janë përmes përmbartimit shujtat e mësimdhënësve dhe ato të mjekëve, në vitin 2021 kemi pasur edhe vendime të dyshimta të gjykatave që janë realizuar si p.sh ajo e kompanisë “Astra Pllan” në vlerë prej 70,000.00 € e cila këto mjete i ka marrë në saje të një vendimi gjyqësor të dyshimtë, e që nuk kemi deklarime se zyra ligjore e komunës a e ka mbrojtur interesin e komunës apo kemi hapësirë për ndonjë hetim të kësaj çështjeje. Andaj vetë pagesa me vendim gjyqësor për Kompaninë “Astra Pllan” në vlerë mbi 70, 000.00 € bëjnë më shumë se vlera totale e këtyre shpenzimeve për vitin 2021 e paraqitur në raport në vlerë prej 7,271.64€. Dhe si përfundim i kësaj pa hyrë në detaje tjera kërkoi nga ZKF-ja që në formë analitike të ofrojë shënime lidhur me shpenzimet, të hyrat dhe planifikimet, në të kundërtën në si kuvend po kalojmë një dokument i cili nuk i përmbush standardet e raportimit të drejtë e korrekt, e madje ka edhe vend për pasaktësi e dyshime, të cilat fshehin vendime gjyqësore që realizohen e të njëjtat nuk raportohen në kuvend, ku qëndron zyra ligjore këtu e cila po fshehet, ku është përfaqësimi, çka kanë përfaqësuar, kënd e kanë mbrojtur e kënd e kanë favorizuar. Lidhur më këto ai kërkoi nga zyra ligjore e komunës që në kopje fizike t’i ofrohet lënda e kompanisë <Astra Pllast>, me të gjitha shkresat e lëndës, mënyrën e përfaqësimit, deklarimi i zyrës ligjore para gjykatës, ushtrimi i rregullt dhe brenda afateve ligjore i mjeteve juridike apo ka pasur ndonjë marrëveshje të dyshimtë dhe të fshehtë.

Faton Hyseni, anëtar i kuvendit - kërkoi sqarime se përse anëtari i kuvendit Adnan Lahu, nuk u përgjigj në pyetjet e Nasuf Aliut, anëtar i kuvendit nga radhët e LVL-së, lidhur me shpenzimet për drekat zyrtare për vitet 2020-2021.

Adnan Lahu, anëtar i kuvendit - përsëriti se raporti është joprofesional dhe si i tillë nuk është i shoqëruar me komente sqaruese, për çka e kemi tërhequr vëmendje edhe më herët.

Ferit Idrizi, Kryetar i komunës - tha se në përgjithësi pajtohet me deklaratimet e anëtarëve të kuvendit se raportit i mungon ana analitike dhe komentet shoqëruese për secilin kod ekonomik dhe shpenzim buxhetor. Ai ka mendimin se kërkesat e parashtruara të përmbledhura të procesohen dhe evidentohen në procesverbal dhe përgjigjet të merren nga dikasteret komunale, por mbi të gjitha ky raport do t’i nënshtrohet edhe procedurave të auditimit të përgjithshëm, ku nga fundi i vitit do të jetë rasti që të gjitha këto çështje të ngritura të dalin në sipërfaqe.

Sylejman Mehulli, anëtar i kuvendit - duke i kushtuar një vëmendje të hollësishme investimeve kapitale, shtroi temën e projektit vendosja e rrethojave QKMF-Vushtrri vlera prej 30,000.00 € realizimi total i tyre 30,000.00 €, për këto pyeti se ku janë vendos këto rrethoja dhe a janë kryer pagesat për këtë projekt. Pastaj kodi ekonomik 48280 projekti rregullimi i hapësirave dhe oborreve të QMF-ve dhe AMF-ve planifikimi 47,000.00 €, ndërsa 15,000.00 € të realizuara një pjesë prej 30,000.00 € të mbetura, andaj cilat QMF dhe AMF janë rregulluar dhe cilat kanë mbetur pa u rregulluar. Po ashtu ndërtimi i QMF-së së re në Vushtrri e cila para një viti ka qenë në përfundim e sipër, por që më vonë kanë shkuar duke u zvarritur punimet, ku për këtë projekt kanë qenë të planifikuara 78, 000.00 €, ndërsa janë realizuar 12,000.00 €, kurse kanë shkuar në suficit

65, 000.00 €, dhe kjo është tepër e dëmshme për faktin se qendrat e mjekësisë janë tepër të ngarkuara, ndërsa zvarritja e punimeve po shkakton dëme ekonomike dhe dëme në aspektin e akomodimit e nevojave për ofrimin e shërbimeve shëndetësore.

4. Shqyrtimi i Draft – Planit të Punës i Kuvendit të Komunës për vitin 2022

Melihate Basholli-Latifi, kryesuese e kuvendit - kërkoi që pika lidhur me informatën për ecurinë e dhënies së pronës në shfrytëzim të zhvendoset nga muaji prill në muajin shtator.

Nasuf Aliu, anëtar i kuvendit - kërkoi që të bëhen disa korrigjime në Planin e Punës të Kuvendit të Komunës për vitin 2022, gabime teknike sa i përket referimit në vitin kalendarik. Pastaj propozoi që në muajin tetor të futet si pikë <Informata lidhur me zbatimin dhe efektet e Planit për rimëkëmbje ekonomike>, ndërsa në muajin nëntor të sillet informata e korrigjuar si informatë lidhur me strukturën e bizneseve, numrin e të punësuarve, zhvillimin e bizneseve, si dhe statistikat lidhur me stimujt komunal në hapjen e vendeve të reja të punës. Në muajin dhjetor propozoi që të kemi një informatë lidhur me zbatimin e Planit të punës të Kryetarit të komunës për vitin 2022.

Sylejman Mehollli, anëtar i kuvendit - me qëllim që të kemi një tablo sa më gjithëpërfshirëse lidhur me gjendjen epidemiologjike në Komunën e Vushtrrisë, propozoi që në plan të futet një informatë gjashtëmujore lidhur me gjendjen epidemiologjike, për sëmundjet infektive, sigurinë e ushqimeve dhe ujit të pijes, në muajin korrik.

Agron Përçuku, anëtar i kuvendit - propozoi që nga plani të hiqet Informata lidhur me sigurinë e produkteve ushqimore nga Drejtoria e Inspektimeve, kjo për faktin se inspektorët e sanitarisë, tashmë kanë kaluar në përgjegjësinë e Agjencisë të Ushqimit dhe Veterinës, dhe kompetentë për këtë çështje tash e tutje është kjo agjenci.

Ymer Haradinaj, anëtar i kuvendit - kërkoi që në plan të korrigjohet numri i mbledhjeve të kuvendit, pasi që thuhet që kuvendi mund të mbajë 11 mbledhje të rregullta, ndërsa ne sot jemi në ditën e fundit të muajit janar dhe kuvendi ka mbajtur 2 mbledhje të jashtëzakonshme, kjo për shkak të konstituimit të organeve komunale.

Mek Selaci, anëtar i kuvendit - propozoi që në plan të futet nxjerrja e një rregulloreje për organizimin e këshillave të fshatrave dhe sponsor i këtij dokumenti të jetë Drejtoria për Administratë.

Në fund të diskutimeve lidhur me këtë pikë të rendit të ditës, Kuvendi pas votimit me vota “unanime” aprovoi Planin e Punës të Kuvendit të Komunës së Vushtrrisë për vitin 2022.

5. Shqyrtimi i Draft – Planit të Punës i Kryetarit të Komunës për vitin 2022

Ferit Idrizi, Kryetar i komunës - tha se kemi bërë përpjekje që të kemi një plan gjithëpërfshirës, i zbërthyer në objektiva dhe aktivitete, andaj këtë plan do të tentojmë që ta përmbushim në tërësi gjatë vitit 2022.

Nasuf Aliu, anëtar i kuvendit - referuar në faqen 2 dhe 3 të këtij plani kemi përzierje kompetencash sa i përket objektivave të zhvillimit ekonomik dhe arsimit për të rritur, ku thuhet ofrimi i arsimit për të rritur pa pagesë për profilet që kërkohen në tregun e punës, këtu kërkoi të specifikohet se për cilin arsim bëhet fjalë dhe pika tjetër mbështetje në hapjen e bizneseve, dhe kjo sipas tij bie në domenin e kompetencave të sektorit të zhvillimit ekonomik. Pastaj ka paqartësi sa i përket rritjes së fondeve për stimulim në bujqësi, të specifikohet se sa do të jetë kjo rritje, sepse nga granti qeveritar kemi vetëm 33,450 € ndërsa pjesa tjetër janë bashkëfinancime dhe nga të hyrat

vetanake. Mandej mbështetja e bizneseve prodhuese duke iu mbuluar normën e interesit të kredive në vlerë deri 20,000.00 €, kjo është mirë dhe i ndihmon bizneset e vogla dhe të mesme, ndërsa askund nuk është dhënë shifra se sa do të jetë buxheti i drejtorisë për këtë objektivë. Hapja e zyrës për diasporën dhe promovimin e klimës së investimeve, është nevojë imediate dhe e kahershme, për këtë pyeti se kur do të ndodhë kjo dhe si do të duket. Aplikimi i lehtësirave për investitorët nga diaspora, është mirë të ndryshohet lehtësira për investitorët e jashtëm dhe ata nga diaspora, këtu kërkoi të sqarohet se për çfarë lehtësirash bëhet fjalë, kur dihet se kjo do të jetë sfida kryesore e qeverisë komunale që lidhet me nxitjen e investimit dhe zhvillimit ekonomik lokal në përgjithësi. Tutje ai i rekomandoi kryetari të komunës që t'i ngrit kapacitetet humane, duke rekrutuar staf shtesë sidomos në Drejtorinë e Ekonomisë, e cila duhet të jetë fondamenti kryesor dhe bartëse e zhvillimit ekonomik lokal. Në këtë plan kishte me qenë mirë që të buxhetohet dhe inkorporohet edhe fondi për ndërmarrësi që shumë të ri dhe të reja të posadiplomuara të kenë mundësi të stimulohen për hapjen e bizneseve dhe vendeve të punës. Mandej në plan nuk është inkorporuar stimulimi i qumështit, dhe pyeti se kur pritet ristrukturimi i Drejtorisë për Ekonomi që është një ide e kahershme.

Ferit Idrizi, Kryetar i komunës - duke ju referuar parafolësit, sqaroi me sa vijon: së pari arsimi për të rritur nënkupton grupmoshën mbi 18 vjeç dhe që janë jashtë asaj që është arsim i rregullt. Pastaj shtoi se arsimi jo i rregullt apo siç njihet si arsimim privat, komuna do ta bëjë pa pagesë duke e shndërruar në aftësim-arsimim modular artizanal i cili do të zgjatë nga 3-5 muaj dhe në fund të bëhet certifikimi. Do të hartohen dhe harmonizohen kurrikulat. Qëllimi është që të kemi ndërlidhje mes aftësimit profesional dhe ndërmarrësisë, ndërsa aty ku nuk do të ketë mundësi punësimi në ndonjë ndërmarrje, do të krijohen start-up që do të financohen nga komuna për ngritjen e tyre. Sa i përket bujqësisë ai njoftoi se ka pasur një takim me fermerët vushtrias, ku është njoftuar nga afër lidhur me sfidat e tyre, dhe ka një plan që pas miratimit të buxhetit do të mendohet edhe subvencionimi i bujqve e sidomos subvencionimi me 50% i pronave nën masën komosative dhe të ujitjes. Në fund tha se të gjitha kërkesat nga fermerët i kanë marrë dhe tani ato do të analizohen dhe bashkërisht do të vendosim për më të mirën e mundshme (ai e falënderoi parafolësin dhe u zotua se propozimet e tij do të jenë pjesë integrale e planit).

Nasuf Aliu, anëtar i kuvendit - paraqiti vërejtjet e tij në faqe 32, pika 10, organizimi i sektorit të teknologjisë janar-qershor duhet të jetë për tërë vitin, kjo duhet të jetë kështu për faktin se teknologjia është aspekt mjaft me rëndësi në zhvillimin ekonomik, ndërsa si aktivitet duhet të inkorporohet në Drejtorinë për Zhvillim Ekonomik. Pastaj tek inspektimet ku thuhet: mbikëqyrja inspektuese dhe procedura për lëshimin e certifikatës së përdorimit për të gjitha objektet e ndërtimit të lartë për lëshimin e lejes së ndërtimit së bashku me Drejtorinë e Urbanizimit vetëm gjatë muajit mars dhe prill dhe kështu kjo është e kufizuar apo ndoshta është ndonjë gabim teknik. Po ashtu në faqe 39 pika 10 thuhet: do të angazhohemi në mbrojtjen e qytetarëve nga zhurma dhe vibracioni, është vetëm në muajit mars dhe prill, kjo duhet të jetë gjatë tërë vitit. Mandej pika 12 ripyllëzimi i sipërfaqeve djerr me fidane të reja dhe të shtojmë sipërfaqet e gjelbëruara në qytet, kjo pikë duhet të futet në kuadër të Drejtorisë për Ekonomi, Bujqësi dhe Zhvillim Rural. Tek Drejtoria e Urbanizimit faqe 44 pika 4 thuhet: inicimi i procedurave për asfaltimin e rrugëve të aprovuara nga Kuvendi i Komunës së Vushtrisë sipas Planit Zhvillimor Komunal, duhet të jetë edhe sipas buxhetit të aprovuar nga ana e kuvendit. Në faqen 49 mungon titulli i organit përgjegjës.

Sylejman Mehulli, anëtar i kuvendit - duke ju referuar planit, u ndal tek objektivat në fushën e shëndetësisë dhe mirëqenies sociale faqen 19-20, dhe kësisoj ai vlerësoi se të gjithë kandidatët për kryetar komune janë pyetur se si do ta menaxhojnë pandeminë covid-19, dhe këtu në këtë plan nuk kemi asnjë fjalë të vetme sa i përket kësaj çështjeje, edhe ai në Komitetin për Politikë dhe Financa

kishte rekomanduar që të futet në plan trajtimi i kësaj problematike. Lidhur me këto ai vlerësoi se nuk kemi asnjë informacion se si Komuna e Vushtrrisë e sheh çështjen e menaxhimi të pandemisë, pastaj përdorimi dhe qasja ndaj vaksinimit kundër covid-19 dhe mendon se kjo është mjaft shqetësuese, sepse është mungesë fundamentale në një plan në situatën pandemi siç ndodhemi aktualisht. Mandej është caktuar si objektiv riorganizimi i reformimit të sektorit të shëndetit oral, por nuk është dhënë asnjë sqarim se si do të bëhet kjo, mandej tek pjesa e detajuar në faqet 18,19 dhe 20 pothuajse është i vetmi sektor shëndetësia që nuk kemi të dhëna as tabelare se si komuna do t'i qaset zhvillimit të këtij sektori dhe realizmit të objektivave të planit në lëmin e shëndetësisë, dhe në këtë kontekst krejt çka është paraqitur është një kopje e udhëzimit administrativ, ku parashihen shërbimet nga kujdesi parësor shëndetësor, por jo plani i punës se si do të arrihen këto objektiva para nuk ka asnjë sqarime lidhur me këto çështje. Përkundër kësaj kemi ide ambicioze e mjaft të pëlqyeshme sa i përket zgjidhjes së çështjeve të familjeve pa strehë dhe e mbështet këtë projekt, por kërkoi të di se sa është planifikuar buxhet për këtë projekt, dhe a do të ketë objekte banimi për këto shtresa mjaft sensitive të qytetarëve tanë, dhe se a do të rritet numri i familjeve që do të strehohen, kjo do të ishte mirë, por duhet të rishikohen edhe familjet tjera që nëse iu është përmirësuar gjendje t'i ia lëshojnë radhën një familjeje tjetër e cila ka nevojë. Në fund tha se është tepër imanente dhe imediate që të fillohet me digjitalizimin e administratës komunale, duke filluar nga organi më i lartë Kuvendi i komunës, ku duhet të bëhet digjitalizimi i votimit elektronik, përmirësimi i zërimit, krijimi i kushteve të ngrohjes, kjo duhet të bëhet përmes kodeve të caktuara ekonomike dhe i takon kryesueses së kuvendit që bëjë presion tek qeveria komunale të ky projekt të realizohet sepse kjo do të ngritë performacën dhe transparencën komunale.

Ymer Haradinaj, anëtar i kuvendit - duke ju referuar planit, u ndal tek arsimit për të rritur, aty ku thuhet ofrimi pa pagesë i arsimit për të rritur i profileve që kërkohen nga tregu i punës, ku sqaroi se arsimit për të rritur organizohet në dy shkolla në shkollën profesionale dhe teknike, ku semestri zgjat 6 muaj dhe pagesa për një vit është 150 €, llogaritja e një viti shkollor në afat prej 6 muajsh, del që një i rritur për një vit e gjysmë të përfundojë aftësimin profesional, andaj duke llogaritur 3 vitet nga 150 € bëjnë 450 € kur ia shtojmë edhe pagesën e diplomës del se kostoja totale e një drejtimi për aftësim profesional është 500 €. Andaj lidhur me këtë ai vlerësoi se është një mundësi e mirë, për këta të rritur për të marrë një profesion, por duhet pasur parasysh që së pari të merren drejtimet e mandej profilet, ashtu që të bëhet një targetim se cilat janë drejtimet më të kërkuara në tregun e punës në Komunën e Vushtrrisë, dhe pyeti se cilat do të jenë kriteret mbi bazën e të cilave të bëhet lirimi këta nga pagesa për këta persona. Pastaj është ide e mirë mbështetja e hapjes së bizneseve dhe ceku se është me rëndësi t'u jepet përparësi bizneseve prodhuese dhe atyre përpunuese.

Bekim Zabërgja, anëtar i kuvendit - duke ju referuar faqes 4 të planit ku thuhet: do të angazhohemi në kthimin në pronësi të komunës të parcelave që më herët i janë dhënë në shfrytëzim Burgut të Smrekonicës, të cilat tani evidentohen në emër të Ministrisë së Drejtësisë, me qëllim të themelimit të zonës së lirë ekonomike në fsh. Banjskë dhe Smrekonicë. Tutje sipas informatave të tij komuna në fshatin Banjskë ka rreth 75 hektarë tokë në pronësi të saj, dhe afër 200 hektarë me male. Ai propozon që ky projekt të mos quhet zonë ekonomike, por zonë industriale dhe sugjeroi që të inicohet menjëherë procedura për kthimin e këtyre pronave në pronësi komunale. Dallimi në mes të zonës ekonomike dhe asaj industriale sipas tij është se zona ekonomike është ajo që kemi investime më të vogla sikur është ajo në Lumadh, ndërsa zona industriale është ajo që kemi investime më të mëdha kapitale ekonomike, kjo e fundit është bazë apo themel i investimeve të mëdha të huaja dhe vendore dhe për hapjen e vendeve të reja të punës. Pastaj tek faqja 35 ku flitet për manifestimin përkujtimor të masakrës së Studimës, konkretisht tek organizimi i Turneut

memorial në shah, kërkoi që këtë të drejtë ekskluzive ta ketë Klubi i shahut “Llamkosi”, sepse është klub profesional dhe ka pasur suksese edhe në arenën ndërkombëtare.

Fatmire Cecelia, anëtare e kuvendit - në referim të planit tek objektivat e DKRS-së, propozoi që të futet festival i këngëve për fëmijë, sepse ky event kishte filluar edhe më herët po për shkak të pandemisë është ndërprerë. Ky organizim do të ishte një hapësirë e mirë për shprehjen e talentit të fëmijëve në lëmin e muzikës.

Refik Maloku, anëtar i kuvendit - tha se pasi që kryetari i komunës ka dhënë shumë premtime elektorale për arsimin si veprimtari shoqërore, andaj pyetje do t'i adresojë direkt kryetarit e jo drejtoreshës së arsimit. Andaj vlerësoi se në plan lidhur me arsimin ka ndërtim, ka mirëmbajtje, ka renovim, ka furnizim d.m.th. gjithçka ka por jo edhe arsim që i bie arsim në kuptimin e investimeve në ngritjen e cilësisë së arsimit. Në këtë kontekst mori disa shembuj si: furnizim me material higjienik, ndërtim i tualeteve prej 85,000.00 €, ndërsa subvencionim me bursa për nxënësit kemi vetëm 60,000.00 €, ky është një shembull që shpërfaq haptazi se sa i është kushtuar rëndësi arsimit në Komunën e Vushtrrisë. Krejt vëmendja është koncentruar në ndërtim, furnizim dhe mirëmbajtje dhe kjo nuk është element që ndikon në ngritjen e cilësisë së arsimit. Në fund tërhoqi vëmendjen se duhet pasur shumë kujdes sa i përket këtij arsimit për të rritur, duke i specifikuar mirë drejtimit sepse dihet nga e kaluara se sot ka mësues që e kanë kryer shkollën e mesme në këtë formë e të cilët nuk dinë shkrim-lexim për veten e tyre, ndërsa ju japin “mësim” nxënësve andaj kujdes me këto gjëra!

Sylejman Mehulli, anëtar i kuvendit - tha se tek fusha e shëndetësisë flitet për ndërtimin e dy laboratorëve e të cilët me sa di ai ata janë të ndërtuar. Pastaj në plan nuk është i përfshirë premtimi elektoral për shujtat për profesionistët shëndetësorë, dhe pyeti se ky premtim a do të përmbushet, nëse po, si, a ka bazë ligjore për faktin se profesionistët shëndetësorë e marrin një shtesë në pagën e tyre për shujtat në mënyrë ekskluzive dhe pyeti se a do të ketë bazë ligjore për të bërë një subvencionim të dytë për ta realizuar këtë premtim.

Ferit Idrizi, Kryetar i komunës - duke ju referuar diskutimeve të anëtarëve të kuvendit, shtoi se menaxhimi i pandemisë duhet të futet në kuadër të planit të punës të kryetarit të komunës, kjo për faktin se jo vetëm të shkruhet në letër, porse është punuar në këtë drejtim sepse është themeluar shtabi emergjent komunal për menaxhimin e gjendjes së pandemisë, dhe ai shtab ka mbajtur disa takime dhe menaxhimi është duke u bërë sipas udhëzimeve të IKSHPK-së. Sa i përket shujtave të profesionistëve shëndetësorë vlerësoi se ka vullnetin të realizojë këtë premtim por gjithëherë në kuadër të ligjit, por është menduar që realizimi të bëhet nga fondi mallra dhe shërbime. Pastaj u zotua se në plan do të bëhet përshkrimi i objektivave tek shëndetësia në formë tabelore. Tek turneu memorial i shahistëve do t'i jepet hapësirë Kubit të shahistëve “Llamkos”. Lidhur me pronat në fshatin Banjskë ceku se ato prona nuk janë në pronësi komunale, por do të bëjmë përpjekje që ato të rikthehen për nevojat e komunës. Për sa i takon targetimit të drejtimeve profesionale që janë të kërkuara në tregun përmendi disa prej tyre si: elektor-saldues, instaluese i ujit, instalues i rrymës, instalues i ngrohjes qendrore, kuzhinierë, rrobaqepësi, janë këto drejtime që kërkohen më së shumti në tregun e punës dhe është menduar që të shkohet në sistemin modular 3-5 muaj dhe do të jetë mësim drejtpërdrejt në vendin e punës, do të bëhen kontrata me ndërmarrjet gjegjëse aty ku ka mundësi. Propozimi për organizimin e festivalit të këngëve për fëmijë u zotua se do të futet në planin e punës dhe obligoi DKRS-në që ta inkorporojë këtë propozim në planin e punës të kryetarit. Sa i përket investimeve në infrastrukturën shkollore normalisht se kanë një kosto më të lartë, por edhe në ngritjen e cilësisë së arsimit do të fillohet me organizimin e garave sidomos në shkencat ekzakte por edhe në disa lëndë shoqërore, fillimisht do startohet me një pilot-projekt në të gjitha shkollat për klasat e 5,9 dhe 12 dhe të organizohen gara-kuize të diturisë. Mandej është menduar

të organizohen gara sportive por edhe në muzikë dhe kulturë. Do të themelohet një grup punues që do t'i hartojë të gjitha pyetjet për këto gara të diturisë. Është menduar për mësimdhënësit që marrin pjesë të jepet një kompensim monetar- pagesë për t'i motivuar dhe po ashtu edhe nxënësit.

6. Shqyrtimi i propozim – buxhetit për vitin 2022

Adnan Lahu, anëtar i kuvendit - pasi i përshëndeti të pranishmit tha se para nesh kemi propozim buxhetin për vitin 2022, buxhet i cili duhet të ishte shumë më ndryshe. Në 55 premtimet e para të kryetarit Idrizi, është thënë që buxheti do të hartohet se bashku e në konsultim me qytetarët, ngase siç thoshte kryetari nga 100 fije sa kishte, 99 fije nga to ka me qytetarët ndërsa një fije me PDK-në. Sot, në këtë moment jemi në ditën e 56, e z. Idrizi nuk ka përmbushur as edhe një premtim të vetëm nga 55 premtimet e tij të para e natyrisht që nuk kemi as buxhet në konsultim me qytetarët. Përkundrazi para nesh kemi një buxhet të përgatitur nga dega e PDK-së në Durrës. Madje në këtë buxhet nuk kemi as edhe një projekt-propozim të vetëm të ri nga qeverisja juaj. Keni larguar projekte të rëndësisë se veçantë nga draft-buxheti i përgatitur nga qeverisja e kaluar, projekte që janë në shërbim të qytetarëve, madje keni larguar edhe projekte për të cilat Komuna e Vushtrrisë ka të nënshkruar memorandum bashkëpunimi e për të cilat komuna ka edhe obligime financiare. Largimi i projektit të ndërtimit të tregut për prodhues vendor, duke pasur të nënshkruar memorandumin e bashkëpunimit në mes të IRW dhe Komunës së Vushtrrisë është qesharak nga ana juaj. Sa për informim, kuvendi komunal ka ndarë pronën afër ish Motel “Vicianum” për ndërtimin e tregut për prodhues vendor pasi që Qeveria e Kosovës i ka kthyer atë pronë Komunës së Vushtrrisë. Komuna e Vushtrrisë ka hartuar projektin kryesor, kostoja e të cilit është afër 450,000€, e që 400,000\$ mbulohen nga donatori, ndërsa pjesa e mbetur nga Komuna e Vushtrrisë. Andaj, me këtë buxhet ju rrezikoni Komunën e Vushtrrisë të humbë 400,000\$ nga donatori dhe rrezikoni ndërtimin e tregut. Situatë të njëjtë kemi edhe të ndërtimi i Qendrës për Qëndrim Ditor për të moshuarit, po ashtu kemi memorandum bashkëpunimi në mes të Jetimeve të Ballkanit dhe Komunës së Vushtrrisë. Ndërtimi i këtij objekti për të moshuarit tanë kap shifrën mbi 1 milion euro, shumë e cila mbulohet pothuajse tërësisht nga Jetimat e Ballkanit, ndërsa një vlerë simbolike nga Komuna e Vushtrrisë. Të gjitha procedurat për dhënien e pronës për ndërtimin e këtij objekti kanë kaluar përmes kuvendit komunal, duke u respektuar të gjitha procedurat ligjore. Në këtë rast rrezikoni humbjen e 1 milion € dhe largimin e donatorit nga Vushtrria, kur dihet që në katër vitet e fundit Halil Kastrati së bashku me Komunën e Vushtrrisë kanë ndërtuar shtëpi, duke strehuar afër 100 familje në nevojë. Kryetar, premtimet që i keni dhënë për Artakollin, i hodhët poshtë menjëherë duke larguar nga buxheti projektin e rrugës që lidh Novolanin me varrezat e qytetit, për të cilin projekt ka shumë nevojë ngase shkurton distancën për banorët e Artakollit. Premtimet e shumta për rininë tanimë nuk ju bëjnë përshtypje, larguat nga buxheti parkun rekreativ Taraxha, vazhdimin e rregullimit të lumenjve “Tërstena e Podranqa”. Krejt çfarë kemi parë ndryshe në këtë buxhet, është rritja e buxhetit në asfalt e në kubëza dhe kjo nënkupton rikthimin e vërtetë të PDK-së së vjetër në Vushtrri. Të dashur qytetarë të Vushtrrisë, pavarësisht gjitha këtyre, pavarësisht që ky buxhet është sjell për aprovim në Kuvendin Komunal të Vushtrrisë pa dëgjime buxhetore, praktikë kjo e cila nuk ka ndodhur asnjëherë në të kaluarën, Lidhja Demokratike e Kosovës sot do të votojë buxhetin për vitin 2022 dhe si subjekt politik asnjëherë nuk do të bllokojë vendimet e rëndësisë së veçantë si në këtë rast buxhetin.

Ferit Idrizi, Kryetar i komunës - tha se hartimi i buxhetit për vitin 2022 është bazuar në nevojat e qytetarëve dhe se asnjë projekt që ka qenë në të mirë të qytetarëve nuk është larguar nga buxheti dhe se nëse shikohet faqja e 2 e draft-buxheti kodit ekonomik bashkëfinancimi me donatorë në vlerë financiare prej 495,61.000 € e që i bie se prej këtij kodit ekonomik do të merren mjete për financimin e projekteve që ju i referoheni. Pastaj përsëriti prapë se 99 fije i ka me qytetarin e vetëm një fije me partinë që i përket. Dhe në mënyrë konkludente deklaroi se nuk do të jetë më i afërt me deputetët e anës së djathtë sesa edhe me ata të LDK-së, bashkëpunimin do ta ndajë në mënyrë të barabartë. Sa i përket planifikimit të për ndërtimin e tregut për prodhues vendorë, aty kanë qenë të planifikuar vetëm 5000 € nga qeveria e kaluar, mandej kemi probleme pronësore se projekti është planifikuar në pronë të AKP-së, është një vendim i qeverisë që lejon zhvillimin e projekteve nga ana e Qeverisë së Kosovës, por derisa certifikata pronësore shkruan se titullar nuk është Komuna e Vushtrrisë por AKP-ja, atëherë nuk ke të drejtë sepse nuk e kemi paguar 20 % ndaj AKP-së për këto prona. Në mënyrë të ngjashme në pronën e AKP-së është ndërtuar edhe QMF-ja në Vushtri, dhe në këtë rast po dëshiroj AKP-ja do të mund ta padiste komunën dhe do t'i shkaktonte mjaft shumë dëme ekonomike komunës. Pastaj informoi se ka bërë kërkesë që ato prona të kthehen në pronësi të komunës, porse komuna duhet të paguajë 20% dhe gjendje e njëjtë është edhe me tregun, dhe nuk ka dashur që të vëjë gurëthemelin në një pronë të huaj sepse nuk jemi pronar legjitim i asaj prone, në sajë të konsultimeve që ka pasur me drejtorin IRW-së, ai kishte deklaruar hapur se është i mashtuar sepse prona është në emër të dikujt tjetër. Lidhur me ndërtimin e tregut për prodhuesit vendorë, mendohet të ndahen rreth 250,000.00 €, por që prona ku do të ndërtohet akoma nuk është evidentuar dhe përcaktuar. Andaj përfundimisht potencoi se asnjë projekt nuk është larguar nga buxheti dhe i siguron qytetarët se nuk do ikë përgjegjësisë që ka marrë si kryetar komuna, ndërsa sa i përket ndërtimit të rrugës nga fshati Novolan në drejtim të varrezave dhe kycjes në magjistrale, ky ka qenë një projekt utopist nga ana e qeverisë së kaluar komunale sepse vetëm ura tek hyrja në qytet mbi lumin "Silnica" kap shifrën rreth 2 milionë euro, dhe mos-hyrja në buxhet është bërë sepse ai nuk fut projekte pa mbulesë buxhetore. Në fund tha se buxheti është planifikuar në interes qytetar, dhe shtoi se ata që kanë lënë komunën me ngrohje me tela dhe flasin për megaprojekte e kanë radhën të pushojnë pak.

Remzi Ahmeti, drejtor i DBF-së-sqaroi se obligimet e bartura nga vitin 2021 në vitin 2022 janë me sa vijon: për rrugë me kubëza dhe beton kemi 289,561.024 €, për zgjerimin e rrjetit të ujësjellësit kemi 180,000.00 €, për rrugën tek varrezat e qytetit kemi 44,264.053 €, për rikonstruktimin e rrugëve të asfaltuara kemi obligime të bartura prej 100,000.00 € dhe për rregullimin e lumit "Silnica" kemi 40,000.00 €.

Adnan Lahu, anëtar i kuvendit - tha se shuma financiare prej 2,500,000.00 € nuk janë borxhe por janë mjete që kanë shkuar në suficit buxhetor dhe këtë duhet ta keni parasysh, ku nga kjo shifër 820 mijë euro janë nga 21-shi pra të hyra vetanake, 620 mijë euro nga 22-shi pra të hyra të bartura, pra të hyrat nga 21 dhe 22 janë mjete që barten në vitin vijues dhe nuk janë mjete të humbura. 1 milion janë nga granti Qeveritar, ku prej të cilave 550 mijë euro kanë qene për investime kapitale, dhe duke pasur parasysh mos funksionimin e OSHP dhe bordit te saj për një kohë të gjatë dhe për shkak të pandemisë këto procedura nuk kanë pasur mundësi të përfundohen. Ndërsa kryetar sa i përket pronave të AKP-së, përveç vendimit të ish kryeministrit Haradinaj, kemi edhe një vendim nga AKP te cilin po ju citoj : " Vendim, Aprovohet lejimi/pëlqimi për zhvillimin e projekteve te Komunave Istog, Deçan, Vushtri sipas kërkesave të tyre , respektivisht sipas vendimit te qeverise". Pra kryetar në këto prona mund të zhvillohen projektet e komunës në bazë të këtij vendimi. Krejt ne fund Kryetar kam një pyetje, Gjimnazi i ri në Vushtri në cilën toke është i ndërtuar dhe në cilën kohë. Është i ndërtuar në tokë të AKP-së në kohë te PDK-së.

Sylejman Mehulli, anëtar i kuvendit - tha se miratimi i buxhetit, gjegjësisht vendimi për buxhetin përbën aktin më themelitar dhe më fundamental të aprovuar nga një kuvend komunal në një vit të zhvillimit të seancave të tij. Duke parë që ky buxhet është sjellë në kuvend pa zhvilluar konsultim publik me qytetarë e bënë këtë buxhet dhe këtë proces jo fortë kredibil. Por ajo që është akoma më shqetësuese është fakti se tek planifikimi urban dhe mjedisi, kemi ndërtimin e rrugëve lokale në fshatra dhe pastaj kodin e riasfaltimit të rrugëve në fshatra si tërësi apo si pako, por ajo që ata i bënë të shqetësohen është dhe që është një praktikë e pahasur më parë në Komunën e Vushtrrisë dhe e cila bie në kundërshtim të plotë me parimet e transparencës, gjithëpërfshirjes dhe trajtimit të barabartë të secilit lokalitet, është diskriminimi pozitiv apo favorizimi që i bëhet tri fshatrave me shumicë të komunitetit serb, të cilat caktohen si kode të veçanta buxhetore dhe atë: asfaltimi i rrugëve në fshatin Prelluzhë, asfaltimi i rrugëve në Gracë dhe asfaltimi i rrugëve në fshatin Gojbulë, kjo është e papranueshme dhe jo për faktin se janë kundër investimeve në këto fshatra, por të hedhen poshtë 63 lokalitete tjera, fshatra dhe vendbanime tjera të Komunës së Vushtrrisë me shumicë shqiptare, të mos favorizohen të mos përmenden të futen në pako dhe të nxirren nga pako vetëm këto tri fshatra të komunitetit serb me kode të veçanta buxhetore, kjo definitivisht është një mendësi e vjetër që na ka përcjellë që nga koha e UNMIK-ut për 20 vite me radhë, kjo është logjikë e diskriminimit pozitiv, e kompetencave të zgjeruara, të favorizimeve të caktuara që i janë bërë lokaliteteve dhe nacionaliteteve të caktuara në këtë vend, andaj pa dashur të diskutojmë për çfarëdo çështje tjetër për këtë buxhet, kërkoi që këto kode të përmirësohen menjëherë ashtu që shumat për këto fshatra prej 50,000.00 €, 25,000.00 € dhe 20,000.00 € të kalojnë në pakon e përgjithshme <ndërtimi i rrugëve në fshatra>, nuk pranojmë që të favorizohen grupe të caktuara dhe lokalitete të veçanta, kjo nuk i bënë nder askujt e as juve, dhe si subjekt politik nuk lejojnë që ta shantazhojnë kryetarin e komunës asnjë grup etnik, duke vendosur kushte, sepse do të ia japin votën, se shumica shqiptare është prej 34 deputetëve në kuvend dhe ka mundësinë formale e ligjore të kalojë çdo pikë të rendit të ditës, duke përfshirë edhe buxhetin e komunës. Andaj përfundimisht kërkoi që kjo çështje të korrigohet menjëherë dhe një logjikë dhe formë e tillë e diskriminimit pozitiv të mos përsëritet më kurrë.

Ymer Haradinaj, anëtar i kuvendit - tha se sot jemi në këtë mbledhje të jashtëzakonshme të kuvendit ku pritet të votohet buxheti i komunës për vitin 2022 dhe edhe ashtu jemi vonuar në aprovimin e tij. Buxheti për vitin 2022 do të jetë 19,862.886.00 €, nga këto 53,97 % janë të dedikuara për paga dhe mëditje, tek investimet kapitale kemi 4,779.107.00 €, marr në shpenzime i bie që 26 % e buxhetit komunal janë për këtë kategori ekonomike, këtu sigurisht kemi të bëjmë me ndonjë gabim teknik sepse shpenzimet nga investimet kapitale janë 24,06 %, dhe nëse e bëjmë dallimin mes 26% dhe 24.04 € del një vlerë financiare prej më shumë se 385,000.00 € dhe për këtë kërkoi që kjo të përmirësohet sepse kemi të bëjmë me dokumentin kryesor financiar të komunës. Kur flitet për investimet kapitale, shihet se tek arsimit është planifikuar ndërtimi i një çerdheje ku është ndarë një shumë prej 20,000.00 €, ndërsa vitin e kaluar ish kryetari i komunës shkollën e fshatit Stanoc i Epërm e ka dhënë në shfrytëzim për destinim ndërtimin e një fabrike të tekstitit e quajtur “Vitex” e cila sipas tij do të mund të punësonte 60 gra, kjo kontratë është njëvjeçare dhe përfundon në muajin shkurt, prandaj kërkoi nga kryetari i komunës që ta trajtojë me seriozitet çështjen e ish-objektit të vjetër të shkollës fillore “Migjeni” në Stanoc të Epërm” dhe pas skadimit të kontratës ky objekt t’i kthehet atij komuniteti, të kthehet në gjendjen ashtu siç ka qenë objekt edukativo-arsimor. Ajo se çka e brengosë atë dhe komunitetin atje është se është promovuar se do të punësohen 60 gra dhe kanë kaluar 11 muaj dhe pas 25 ditësh kontrata skadon, ndërsa nëse shikohet në ARBK, del se në këtë fabrikë evidentohet se është i punësuar vetëm një (1) punëtor, por për të qenë real dhe objektiv nëse shkon në atë objekt shihet se sillen 6 apo 7 vajza apo gra.

Në këtë kontekst kërkoi që në buxhetin për vitin 2022 të futen 20,000.00 € për renovimin e ish-objektit të shkollës "Migjeni" në Stanoc të Epërm që ky objekt të shndërrohet në çerdhe për atë komunitet. Pastaj tek arsimi dhe shkenca parashtrori disa pyetje, a keni planifikuar që në buxhetin për vitin 2022 të bëhet pagesa e shujtës, pagesa e udhëtimit, pagesa e pagës jubilarë, pagat përcjellëse në rastin e pensionimit të mësimdhënësve dhe pagesën e licencës së mësimdhënësve siç janë të parapara me kontratën kolektive të nënshkruar nga MASHT-i dhe SBASH-ku në vitin 2017 dhe e ripërtërirë në vitin 2021. Sa për informimin e kryetarit të komunës në vitin 2020 Komuna e Vushtrrisë ka paguar 717, 648.00 € për shujta dhe paga jubilarë, po ashtu shuma e cila u cek edhe në vitin 2021 kemi një shumë të paguar marramendëse, pra kemi fakte të vërtetuara nga gjykatat se mësimdhënësit kanë të drejtë në kërkesat e tyre dhe pagesa e detyrimeve që del nga kontrata kolektive do t'i zvogëlonte shpenzimet edhe për komunën, por edhe për mësimdhënësit të cilët po detyrohen të paguajnë avokat për realizimin e të drejtave të tyre, ndërsa në fund propozoi që në buxhetin për vitin 2022 të futet blerja e lap-topve për anëtarët e kuvendit ashtu që t'u mundësohet një punë e dinjitetshme.

Ilmi Azemi, anëtar i kuvendit - tha se kuvendi i komunës është përgjegjës për miratimin dhe mbikëqyrjen e buxhetit të komunës, ndërsa kryetari i komunës mbikëqyrë administrimin e financave të komunës dhe zbatimin e vendimeve që miratohen nga kuvendi. Kuvendi duhet të ketë informata të mjaftueshme për të bindur veten se financat janë në rregull dhe se objektivat e planifikimit buxhetor dhe financiar janë duke u përmbushur. Dallimi në mes të rolit të kuvendit dhe ekzekutivit është i rëndësishëm në këtë fushë. Në planifikimin e buxhetit të komunës përfshihen një mori e institucioneve sikurse Kuvendi i Kosovës, Qeveria, Ministria e Financave dhe institucione të pushtetit lokal, si kryetari dhe kuvendi i komunës. Gjithsesi ndikim të madh në këtë proces kanë vetë qytetarët, dëgjimet publike dhe konsultimi me grupe të interesit, si dhe shoqëria civile. Anëtarët e kuvendit të komunës duhet të kenë informata të hollësishme mbi secilin hap të procesit të planifikimit të buxhetit të komunës sepse afati kohor nuk është i mjaftueshëm për anëtarët e kuvendit të komunës që të sigurohen se propozim-buxheti i pranuar nga kryetari i komunës është në përputhje me kërkesat e qytetarëve të komunës. Në këtë kontekst, kuvendi i komunës duhet të jetë i njoftuar nga zyrtari kryesor financiar në afatet përkatëse që anëtarëve të kuvendit të komunës t'u japë informata mbi qarkoret buxhetore. Komiteti për Politikë dhe Financa dhe kuvendi i komunës në përgjithësi, kanë përgjegjësi të madhe në fazat e planifikimit dhe mbikëqyrjes së financave komunale. Në fazën e planifikimit, Komiteti për Politikë dhe Financa shqyrton dokumente të rëndësishme si: buxhetin komunal, korniza afatmesme buxhetore komunale, plani i prokurimit dhe i jep rekomandimet për veprime kuvendit të komunës, në rastin konkret mungon plani i prokurimit. Kuvendi i Komunës duke marrë parasysh edhe rekomandimet nga Komiteti për Politikë dhe Financa, shqyrton, dhe në rast pajtimi, miraton, dokumentet kyçe të komunës që lidhen me menaxhimin e financave komunale. Departamenti i Buxhetit Komunal është departamenti në kuadër të Ministrisë së Financave që merret me financat komunale. Ky departament është i përfshirë në proceset e planifikimit dhe zbatimit të financave komunale, pasi që: përgatit propozim-buxhetin për komuna; përgatit pjesën e Kornizës Afatmesme të Shpenzimeve (KASH) Komunale; ndihmon komunat në zbatimin e buxhetit; shqyrton dhe vlerëson kërkesat për ndryshimin e ndarjeve buxhetore; analizon dhe ofron rekomandime rreth transfereve, rialokimeve dhe dorëzimeve tjera që kanë të bëjnë me ndarjet buxhetore; menaxhimin e sistemit elektronik të të dhënave (BDMS); programin e investimeve publike (PIP) apo sisteme tjera për komunat, etj. Analistët e buxhetit komunal, bashkëpunojnë me zyrat komunale për të gjitha çështjet e menaxhimit financiar të komunave. Për shembull, ata pranojnë kërkesat nga komunat dhe i dorëzojnë për procedim, informojnë dhe këshillojnë komunat me qëllim të

respektimit të kornizës ligjore dhe vendimeve të marra në nivel ministror, informojnë dhe këshillojnë komunat në rast se ka deficit të mjeteve në kategoritë ekonomike, etj. Planifikimi i buxhetit duhet t'i përmbahet disa parimeve: të jetë i targetuar ashtu që merr për bazë nevojat specifike të grupeve të caktuara dhe të marginalizuara të shoqërisë. Të jetë gjithëpërfshirës sepse nuk mund të flasim për buxhet të targetuar pa buxhetim gjithëpërfshirës - si mund t'i kuptojmë nevojat e grupeve të ndryshme të shoqërisë pa i përfshirë ata në procesin e planifikimit të buxhetit. Të jetë transparent, ka të bëjë me lejin e qasjes së publikut në të gjitha fazat e buxhetimit, duke përfshirë fazën e planifikimit, por edhe të realizimit të buxhetit të komunës. Transparenca nënkupton që buxheti të jetë jo vetëm lehtësisht i qasshëm, por duhet që të përpilohen formate të thjeshtëzuar lehtësisht të kuptueshme nga të gjithë. Për këtë arsye, organizatat buxhetore duhet të bëjnë të dukshme efektet e shpenzimeve publike në buxhetin vjetor për vitin 2022. Kjo do të kontribuon gjithashtu në rritjen e efektivitetit dhe transparencës së menaxhimit të financave publike. Lidhur me propozim-buxhetin 2022 që do ta trajtojmë sot, theksoi se të njëjtit i mungon tabela 4.4 -projektet e bartura dhe gjithashtu i mungon plani i prokurimit, po ashtu i mungon edhe lista e obligimeve kontingjente të komunës e që rrjedhimisht këto do të artikulonin edhe një deklaratë apo zotim të kryetarit të komunës lidhur me implementimin me sukses të projekt-buxhetit 2022. Pavarësisht të cekurave unë kam bindjen se kryetari dhe qeveria komunale kanë marrë obligime dhe kanë dhanë zotime se buxheti është gjithëpërfshirës, inkorporon zhvillim ekonomik, është në harmoni me nevojat e qytetarëve dhe Standardet Ndërkombëtare të Institucioneve Supreme të Auditimit.

Refik Maloku, anëtar i kuvendit - përsëriti se pa u larguar tri kodet buxhetore për fshatrat Prelluzhë, Gojbulë dhe Gracë të cilat do të duhej të futen në pako me kodin ekonomik buxhetor-asfaltimi i rrugëve në fshatra si pako e përgjithshme, grupi kuvendar i LVV-së as që do të diskutojë lidhur me buxhetin.

Spasoje Stefanoviq, anëtar i kuvendit - duke ju referuar tri fshatrave me shumicë serbe të cekur në buxhet, pra bëhet fjalë për Prelluzhën, Gracën dhe Gojbulën, mund të thuhet se në katër vitet që shkuan, nuk ka pasur investime publike në rregullimin e infrastrukturës, andaj e falënderon kryetarin dhe qeverinë komunale që kanë vendosur që të investojnë në këto fshatra. Investimi në rrugët e këtyre fshatrave është shumë domethënës sepse në ato rrugë nuk do të qarkullojnë vetëm serbët, por edhe komunitet tjera që jetojnë në komunën tonë. Andaj inkurajon qeverinë dhe kryetarin e komunës që të vazhdojë me investime në këto fshatra dhe për këtë e falënderon përzemërsisht.

Alban Bajrami, anëtar i kuvendit - tha se projekt -buxheti i Komunës është instrumenti kryesor për përmirësimin e jetës së qytetarëve dhe për realizimin e investimeve zhvillimore. Natyrisht, si përfaqësues të qytetarëve ne kemi obligimin dhe detyrën të trajtojmë me hollësi projekt-buxhetin dhe të japim vlerësimin tonë. Mbi të gjitha, detyra jonë primare është të sjellim në dukje nevoja dhe të pasurojmë atë me kërkesa të qytetarëve. Unë kam dy kërkesa që mendoj se duhen futur patjetër në këtë projekt-buxhet. E para ka të bëjë me një objekt të cilit si qytetar i kemi shumë borxh. Objekti i çerdhes së qytetit. I kërkoj qeverisjes komunale që të përfshij në projekt buxhet renovimin e jashtëm dhe të brendshëm të këtij objekti. Çerdhja e qytetit është në gjendje jo të mirë. Me investimet që mungojnë dhe kushtet e pamjaftueshme, nuk mund të lejojmë që fëmijët tanë të marrin hapat e parë të dijes dhe socializmit në kushte nën-minimale. Qe 37 vite nga hapja e saj asnjëherë nuk ka pasur renovim të mirëfilltë në çerdhen e qytetit andaj investimi aty është i domosdoshëm. - Kërkesa ime e dytë ka të bëjë me një padrejtësi që ka ndodhur me banorët e rrugës Lidhja e Lezhës. Në një akt diskriminues atyre u është shtruar vetëm njëra anë e rrugës me trotuar. Kërkoj pra gjithashtu që në projekt-buxhet të përfshihet shtrimi i trotuarit të plotë në rrugën "Lidhja

e Lezhës” në qytet Këto dy projekte janë plotësisht të realizueshme dhe nuk kërkojnë buxhet të papërballueshëm andaj kërkoj nga qeverisja komunale që t’i përfshij në buxhet para se të votojmë atë. Gjithashtu, u bëj thirrje që buxhetin ta shpenzoni me përgjegjësi dhe transparencë. Unë si asamblist i LDK-së do të ngre zërin kurdo që këto premisa nuk zbatohen.

Ferit Idrizi, Kryetar i komunës - duke ju referuar diskutimeve të anëtarëve të kuvendit, vlerësoi se do të ishte shumë e logjikshme që të gjitha rrugët që planifikohen të ndërtohen të ishin të specifikuar, sikurse është bërë në rastin e ndërtimit të shkollave dhe objekteve tjera të rëndësishme vitale për komunën. Sa i përket tri (3) pozicioneve buxhetore Prelluzhë, Gracë dhe Gojbulë, sqaroi se mund të futen të gjitha në pako në kodin buxhetor- asfaltimi i rrugëve në fshatra dhe më pas të gjitha këto projekte të ndahen dhe specifikohen me vendim të veçantë të kuvendit, sepse ato investime në ato fshatra të përmendura do të realizohen. Tutje sqaroi se logjika e shpërndarjes së buxhetit në investime kapitale ka qenë që orientimi të bëhet në lokalitetet ku ka më shumë popullatë. Tek kërkesa e Ymer Haradinaj për renovim të çerdhes-shkollës mendon që nga të hyrat e bartura të bëhet një projekt i tillë, dhe sqaroi se problemi nuk qëndron shumë tek ndërtimi dhe adaptimi i objekteve-çerdheve, por problemi kryesor është tek rekrutimi i stafit. Sa i përket hartimit të një table buxhetore lidhur me bartjen e obligimeve kontraktuale dhe detyrimeve kontingjente tha se pajtohet plotësisht se do duhej të hartohej një tabelë e tillë me qëllim që të kemi një prerje të zhvillimit të projekteve. Sa i përket propozimeve të anëtarit të kuvendit z.Alban Bajrmai, sqaroi se projektet për renovimin e çerdhes publike dhe ndërtimi i trotuarit në rrugën “Lidhja e Lezhës” do të mund të financoheshin nga të hyrat e bartura. Andaj duke i inkorporuar këto projekte që i potencoi më lart, bëri thirrje që të votohet dhe aprovohet buxheti i komunës për vitin 2022.

Ali Januzi, anëtar i kuvendit - duke u nisur nga parimi i tij mbipartiak, vlerësoi se gjatë mandatit LDK-LVV, në fshatrat e rrethit të shalës, nuk investuar pothuajse fare, ndërsa vetëm PDK-ja i kishte ndërtuar disa rrugë në fshatin e tij të lindjes, kjo e vërtetë dikujt mund edhe t’i pengojë, por kur thuhet e vërteta atij fare nuk i bënë përshtypje se dikujt i pengon. Pastaj ai ceku dhe përsëriti problemin e kamotshëm të eksploatimit të gurëve shkëmbor në fshatin Pasomë, dhe si rezultat i peshave të rënda janë shkatërruar rrugët dhe po shkaktohet pluhur i madh nga shfrytëzimi i zhavorrit dhe materialeve tjera shkëmbore, dhe kështu këto fshatra janë duke u zbratur nga banorët e atjeshëm lokal. Pastaj shtoi se investimet janë koncentruar kryesisht në pjesën e rrafshit dhe disa rrugë janë kryer edhe në rajonin e Artakollit. Lidhur me këto ai kërkoj që të ketë investime në fshatin Pasomë dhe fshatrat përreth, si dhe të hiqen deponitë ilegale të mbeturinave në fushat e fshatit Banjškë, ku si rezultat i këtyre mbeturinave shpesh bllokohet edhe rruga. Në fund ai kërkoj që në buxhetin e vitit 2022 të futet edhe riparimi i rrugës që fillon nga fshati Sllatinë deri tek fshati Pasomë, si dhe riparimi i disa rrugëve në fshatin Tërllobuq.

Agron Përçuku, anëtar i kuvendit - duke ju referuar diskutimit të parafolësit të tij se ka mungesë investimesh në zonën e shalës, pyeti kryetarin e komunës se a do të jetë në projekt-buxhet projekti investues zona turistike nga “Kodra e flamurit” në fshatin Vesekoc, ku gjatë fushatës e ka vlerësuar si bukuri natyrore të disa fshatrave siç cekën: Kurillova, Bozhllani, Vesekoci, si dhe rregullimi i infrastrukturës që do të bëhet me Prishtinën dhe Podujevën.

Sylejman Mehulli, anëtar i kuvendit - në emër të grupit kuvendar të LVV-së falënderoi kryetarin e komunës për reflektimin e tij që tri kodet ekonomike për tri fshatra me shumicë serbe të trajtohen si të barabarta me lokalitet tjera dhe të jenë në një kod të vetëm buxhetor. Andaj reflektimi i tij vlerësoi se është për t’u respektuar dhe duartrokatur. Tutje shtoi se kjo na jep mundësi që të lëshohemi në trajtimin analitik të buxhetit, duke shtuar se pajtohet me kryetarin e komunës që mos të ketë projekte partiake dhe politike, por ku do që shtrohet nevoja të orientohen investimet, sepse kudo që shtrohet një rrugë apo ngritet një çerdhe apo qendër e mjekësisë, ajo është në të mirën

qytetare, dhe për këtë do ta keni përkrahjen e tyre si grup politik dhe atë kurdoherë që shtrohet nevoja. Megjithatë paraqiti vërejtjet e tij sa i përket shumave buxhetore që janë ndarë në sektorët e caktuar. Tek investimet kapitale ka një shpërputhje të ndarjes së fondeve, dhe se kemi një koncentrim tek pjesa e shërbimeve publike dhe tek pjesa e urbanizmit e që i bie në kanalizime dhe kubëza, si dhe asfalt, 1,818,234.00 € të ndara për infrastrukturë publike janë më tepër se i tërë buxheti i dedikuar për investime kapitale për bujqësi, arsim, shëndetësi, administratë, kadastër e kështu më radhë. Kjo është një shpërputhje e madhe dhe një pabarazi mes sektorëve, andaj ata nuk janë kundër që të investohet sepse ka nevojë, por nuk duhet të ketë kaq shumë pabarazi dhe të mbesin prapa politikat publike sa i përket arsimit dhe shëndetësisë që edhe vetë kryetari i komunës i ka pasur prioritet gjatë fushatës paraelektorale. Është dallim i madh që të kemi 1,818,234.00 € investime në infrastrukturë publike e vetëm 403,000.00 € në bujqësi, kur dihen rrethanat e komunës sonë ku më së shumt zhvillohet bujqësia si veprimtari shoqërore, ose edhe në raport me ndarjet buxhetore për shëndetësi dhe arsim. Njëjtë është situata edhe tek planifikimi urban ku kemi një ndarje buxhetore prej 115,473.00 €, andaj më mirë do të ishte si për qytetarët ashtu edhe për qeverinë e komunës që të kemi balanësim të shpërndarjes së buxhetit mes sektorëve aq sa është e mundshme. E kupton se disa pozicione ekonomike të ndarjeve buxhetore janë determinuar nga borxhet dhe kjo ka bërë që janë rritur kostot financiare. Vërejtje tjetër serioze e që ka qenë për vite me radhë është mungesa e kodit buxhetor për ndërtimin e rrugëve, asfaltimi i rrugëve në qytet dhe konsideron se ky kod buxhetor duhet të kthehet në buxhet tek pjesa e urbanizmit për faktin se ka nevojë të intervenohet në riparimin e rrugëve në qytet sidomos tek unaza e qytetit. Gjithashtu parashtrroi vërejtje edhe tek shpërputhjet mes tabelave financiare buxhetore dhe tabelat financiare të planit të punës të kryetarit, për këto propozoi që të harmonizohen. Mbi të gjitha për hir të transparencës në shpenzimin e parasë publike, kërkoi që pas aprovimit të këtij buxheti të ketë transparencë për sa i takon ndërtimit të rrugëve, për shkak të interesit qytetar, por edhe për shkak të përgjegjësisë që bartni si qeveri, duke u lehtësuar nga drejtim-gishti për favorizime politike dhe rajonale siç edhe kishte ndodhur pak muaj më herët nga ish-kryetari i kaluar që në fshatin e tij kishte ndërtuar apo planifikuar ndërtimin e 35 rrugëve. Kjo mendësi duhet të tejkalohet dhe të rritet transparenca dhe llogaridhënia, në ndërtimin e rrugëve dhe projekteve tjera, në këtë kontekst njoftoi se me ndryshimet e bëra në këtë projekt-buxhet vota e tyre do të jetë pro aprovimit të Buxhetit të Komunës së Vushtrrisë për vitin 2022.

Fatmire Cecelia, anëtare e kuvendit - duke ju referuar subvencioneve të planifikuara në DKRS, njoftoi se në vitin 2018 për këtë drejtori kanë qenë të planifikuara rreth 50,000.00 €, ndërsa shuma e tyre ka shkuar duke u rritur vit pas viti, në vitin 2021 shuma e subvencioneve në DKRS ka qenë 90,000.00 €. Andaj duke i njohur nevojat në DKRS për t'i mbështetur klubet sportive, organizata joqeveritare, kulturore, rinore, artizanalet, artistët, botimet e librave e të ngjashme, kërkoi që subvencionet në DKRS të rriten për së paku edhe 30,000.00 € që shuma totale të jetë 120,000.00 €. Kjo për faktin se në total kemi rritje të subvencioneve sepse deri në vitin 2020 kemi pasur deri në 200,000.00 € subvencione komunale, ndërsa në vitin 2022 kemi një shumë financiare prej 657,000.00 €.

Mek Selaci, anëtar i kuvendit - tha se duke parë që jemi në 100 vjetorin e themelimit të klubit të futbollit, kërkoi që për këtë klub të ndahen 100,000.00 €, mendoi se ka mundësi financiare, sepse shuma e subvencioneve për komunën është mbi 600,000.00 €, dhe beson se do ta ketë përkrahjen edhe të anëtarëve tjerë të kuvendit.

Agim Bregaj, anëtar i kuvendit - propozoi dhe kërkoi që në buxhetin e komunës për vitin 2022 të futet ndërtimi i lapidarit të UÇK-së, në lokacionin afër urës së Prelluzhës në fshatin Gllavatit, kjo për faktin se ky projekt ka qenë i iniciuar qysh para 15 viteve.

Remzi Ahmeti, drejtor i DBF-së - tha se kur bëhet fjalë për ndërtimin e rrugëve nëpër fshatra, duhet bërë të ditur se obligimet e bartura nga viti 2021 në vitin 2022 janë për rrugët në këto fshatra: Taraxhë, Bruznik, Studime, Sllatinë, Stanoc, Maxhunaj, Ropicë, Samadrexhë, Mihaliq dhe Novolan, ndërsa sa i përket kodeve buxhetore të veçanta për tri fshatrat me shumicë serbe, sqaroi se ky ka qenë një zotim i dhënë para OSBE-së, kjo ishte veç sa për informatë. Për sa i përket shtyllave buxhetore ceku se kemi borxhe-obligime të bartura dhe se është tentuar të ketë një balanc nëpër sektorë dhe drejtori sipas kërkesave që i kanë pasur.

Ferit Idrizi, Kryetar i komunës - duke i rikapitulluar diskutimet dhe propozimet e anëtarëve të kuvendit sqaroi me sa vijon: sa i përket ndërtimit të lapidarit të UÇK-së në fshatin Gllavatinë, deklaroi se Agjencioni për Menaxhimin e Memorialëve e ka marrë përsipër ndërtimin e këtij lapidari. Pastaj sa i përket subvencioneve për klubin e futbollit, jemi në mbështetje sepse është 100 vjetori dhe do ta mbështesë nga të hyrat e bartura, sepse e ka kontaktuar edhe klubin dhe kanë dakortsinë që të mbështetet ai klub, madje do të formohet edhe një këshill organizativ për manifestimin e 100 vjetorit. Pastaj i njoftoi anëtarët e kuvendit se për festat shtetërore do t'u dërgohen ftesa për të gjithë anëtarët e kuvendit ku do ti kenë ulëset e veçanta dhe apeloj që të gjithë ta marrin pjesë në ato organizime. Sa i përket rritjes së subvencioneve në DKRS, në vlerë prej totale 120,000,00 €, tha se pajohet që kjo të bëhet nga të hyrat e bartura. Sa i përket propozimit të z.Ali Januzit njoftoi se për fshatin Pasomë janë planifikuar dy projekte: ndërtimi i lapidarit tek vendi i quajtur "Lama e Vocollëve" ku janë ndarë 12,000.00 €, dhe projekti tjetër është renovimi i shkollës në vlerë prej 62,000,00 €. Ndërsa sa i përket rrugëve ai bëri të ditur se të gjitha rrugët janë të buxhetura në mënyrë kumulative, e të cilat do të specifikohen më vonë. Sa i përket kodeve buxhetore për tri fshatrat me shumicë serbe: Prelluzhë, Gojbulë dhe Gracë, njoftoi se vitin e kaluar ish-kryetari i Komunës së Vushtrisë ka marrë zotimin para OSBES-së për një ndarje të tillë të veçantë, por tani po vendosim që të gjitha rrugët të aprovohen në pako, dhe më vonë i ndajmë përmes vendimeve të veçanta. Lidhur me zonën turistike nga "Kodra e flamurit" në fshatin Vesekoc, njoftoi se në njërin nga seancat e kuvendit do të silllet propozimi për shpalljen e asaj zone dhe do të bëhet ndërtimi i atyre rrugëve. Rëndësi të posaçme do t'i kushtohet ndërtimit të rrugës që fillon nga Kozarica tek Barileva, dhe për këtë do të thërras një takim mes kryetarit të Prishtinës, Podujevës dhe Obiliqit, me qëllim të bashkërendimit të veprimeve për zhvillimin e këtij projekti pasi që kjo rrugë i lidhë këto katër komuna. Kjo rrugë do të jetë një artere e fuqishme me qëllim që të vejmë në shërbim turizmin malor sidomos banorëve të Prishtinës në zonën e maleve të shalës.

Ali Januzi, anëtar i kuvendit-e përgëzoi kryetarin për punën që po bënë, dhe shtoi se është shumë e mirëseardhur ndërtimi i lapidarit në fshatin Pasomë, për ta lartësuar figurën e Adem Vocës i cila ka rëndësi hero në vitin 1945 në krahun e ballistëve, dhe më këtë po shënjohej historia jonë e lavdishme. Më tej ai shprehu drojën e tij për shumën e mjeteve financiare e cila dedikohet për ngritjen e këtij lapidari, pasi që kemi të bëjmë me një figurë të madhe kombëtare.

Ferit Idrizi, kryetar i komunës-tha se sa i përket çështjes së shujtës për shërbyesit civil, njoftoi se kërkesën e kemi marr nga sindikata e shërbimit civil, por edhe në vitin 2010 është marrë vendimi për realizmin e shujtave, por që ai vendim është i panënshkruar dhe kjo sigurisht se ka pasur ndonjë defekt se përse ai vendim nuk është nënshkruar. Më tej vlerësoi se kërkesa e sindikatës ka shkuar në zyrën ligjore të komunës, për vlerësim të ligjshmërisë dhe vlerësimi i tyre është se meqë nuk është marr mendimi nga MAPL-ja një vendim i tillë nuk ka fuqi juridike. Andaj kjo çështje duhet të mbetet në pako dhe të shikohet mundësia ligjore dhe financiare e realizmit të këtyre shujtave.

Melihate Basholli-Latifi- duke i falënderuar të gjithë për kontributin e dhënë lidhur këtë pikë të rendit të ditës, e hodhi në votim draft-buxhetin e komunës për vitin 2022, duke i inkorporuar të gjitha propozimet e arsyeshme të dhëna nga anëtarët e kuvendit.

Në fund të diskutimeve lidhur me këtë pikë të rendit të ditës, kuvendit pas votimit me vota “unanime” vendosi me sa vijo:

1. Me këtë vendim aprovohet buxheti i Komunës së Vushtrisë, për vitet 2022-2024, konform Qarkoreve Buxhetore 2022/01 dhe 2022/02 për komuna të lëshuara nga MFPT-ja, për vitin 2022 dhe projeksionet për vitin 2023 dhe 2024.

2. Shuma e përgjithshme e buxhetit të Komunës së Vushtrisë për vitin 2022 është **19,862,886.00 €**, prej të cilave për:

2.1 Paga dhe mëditje.....	10,720,000.00 €
2.2 Mallra dhe shërbime.....	3,278,239.00 €
2.3 Shpenzime komunale.....	428,000.00 €
2.4 Subvencione.....	657,540.00 €
2.5 Shpenzime kapitale.....	4,779,107.00 €

Gjithsej:.....19,862,886.00 €.

3. Të hyrat vetanake të planifikuara.....2,262,795.00 €.

4. Mjetet financiare të cekura në pikën 2 dhe 3 të këtij vendimi janë në pajtim me Qarkoret Buxhetore 2022/01 dhe 2022/02 të MFPT-së, si dhe në bazë të kufijve buxhetorë.

5. Për zbatimin e këtij vendimi obligohet: Drejtoria për Buxhet dhe Financa, Kryetari i komunës dhe drejtoritë tjera kompetente komunale.

6. Tabela 4.1- plani i ndarjeve buxhetore të shpenzimeve për vitin 2022-2024, (kopja e shtypur prej SZHMB, të vulosura si dhe nënshkruar nga kryetari i komunës dhe ZKF). Tabela 4.2 – financimi i projekteve kapitale për vitin 2022 dhe projekteve kapitale shumëvjeçare për vitin 2023-2024 (shtypur nga sistemi PIP, vulosur si dhe nënshkruar nga Kryetari i Komunës dhe ZKF-ja). Tabelat 4.3 plani afatmesëm i të hyrave totale të buxhetit komunal nga grantet qeveritare dhe të hyrat vetanake (shtypur nga BDMS, vulosur si dhe nënshkruar nga kryetari i komunës dhe ZKF-ja), si dhe tabelat e buxhetimit të përgjithshëm gjinor janë pjesë e këtij vendimi, të bashkëngjitura në shtojcë.

7. Ky vendim hyn në fuqi pas aprovimit dhe nënshkrimit nga kryesuesi i kuvendit dhe i njëjti i dorëzohet Ministrisë së Financave për zbatim.

Ferit Idrizi, kryetar i komunës-falënderoi të gjithë grupet politike në kuvend për të mbështetjen unanime në aprovimin e buxhetit të komunës për vitin 2022, i uroj të gjithë duke dëshiruar suksese dhe punë në të mirë të përgjithshme.

Ilmi Azemi, anëtar i kuvendit-propozoi që të futet për trajtim një deklaratë për mbështetjen e profesorit të gjimnazit “Eqrem Çabej” z.Lulzim Paci. Ai potencoi se në qytet është krijuar një atmosferë jo e mirë dhe për ta shmangur gjuhen e bullizimit propozoi që kjo temë të trajtohet jashtë pikave të rendit të ditës ku kuvendit ta ngrit një komision për hartimin e tekstit të asaj deklaratë.

Kuvendi me 29 vota “për” 1 votë “kundër” 2 vota “abstenim” e aprovoj propozimin e anëtarit të Kuvendit z.Ilmi Azemi.

Kuvendi me vota “unanime” aprovoj themelimin e komisionit kuvendar ad-hoc për hartimin e tekstit të deklaratës në mbështetje të profesorit Lulzim Paci në përbërjen si në vijim:

Ilmi Azemi PDK;
Shkelzen Xhaferi LDK;
Mek Selaci LVV.

7. Shqyrtimi i propozim – vendimit për themelimin e Komitetit për Komunitete;

Me vota “unanime” kuvendi aprovoj çelësin e themelimit të Komitetit për Komunitete dhe atë 2 anëtarë nga PDK-ja, 1 anëtar nga LDK-ja, dhe 1 anëtar nga LVV-ja.

Mentor Hasani, anëtar i kuvendit- propozoi Kushtrim Hysenin dhe Zojë Hajrizin për anëtarë të Komitetit për Komunitete nga radhët e PDK-së.

Adnan Lahu, anëtar i kuvendit-në emër të grupit kuvendar të LDK-së, propozoi znj.Leonora Gërgurin për anëtare të Komitetit për Komunitete nga radhët e LDK-së.

Agron Përçuku, anëtar i kuvendit- propozoi për anëtar të Komitetit për Komunitete z.Behar Duraku, nga radhët e LDK-së.

Sylejman Mehulli, anëtar i kuvendit-propozoi znj.Gresa Mulin për anëtare të Komitetit për Komunitete nga radhët e LVV-së.

Adnan Lahu, anëtar i kuvendit-tha se edhe në rastin e themelimit të KPF-së është vepruar njëjtë sikurse edhe tani, dhe shtoi se propozimet janë përfaqësim dhe se propozimet në emër të grupit kuvendar të LDK-së i shefi i grupi.

Kryesuesja e kuvendit i hodhi në votimi dy propozimet e dhëna nga anëtarët e kuvendit nga radhët e LDK-së, pas votimit znj. Leonora Gërguri mori 10 vota “Për”, ndërsa z.Behar Duraku mori 13 vota “për” dhe ky i fundit u konstatua si propozim i aprovuar nga ana e kuvendit.

Në fund të gjitha propozimeve të dhëna nga anëtarët e kuvendit, kuvendit pas votimit me 23 vota “për”, 3 vota “kundër” të tjerët nuk morën pjesë në votim u vendos me sa vijon:

1. Me këtë vendim themelohet Komiteti për Komunitete, i Kuvendit të Komunës së Vushtrrisë në këtë përbërje:

- 1.1 Kushtrim Hyseni, anëtar i Kuvendit të komunës PDK;**
- 1.2 Zojë Hajrizi anëtare e Kuvendit të komunës PDK;**
- 1.3 Behar Duraku anëtar i Kuvendit të komunës LDK;**

- 1.4 Gresa Muli anëtare e Kuvendit të komunës LVV;
- 1.5 Zdravko Zdravkovic, përfaqësues i komunitetit serb;
- 1.6 Berat Maloku, përfaqësues i komunitetit turk;
- 1.7 Zana Krasnic Saraci, përfaqësuese e komunitetit boshnjak;
- 1.8 Aziz Emimi, përfaqësues i komunitetit rom;
- 1.9 Adem Hoti, përfaqësues i komunitetit ashkali.

2. Komiteti për Komunitete, detyrat dhe përgjegjësitë do t'i ushtrojë në pajtim me dispozitat e Ligjit për Vetëqeverisjen Lokale, Udhëzimin Administrativ për Procedurën e Themelimit Përbërjen dhe Kompetencat e Komiteteve të Përhershme dhe Komiteteve Tjera në Komunë, Statutin e komunës, akteve tjera, si dhe Rregulloren e punës.

3. Mandati i anëtarëve të Komitetit për Komunitete është i njëjtë me mandatin e anëtarëve të Kuvendit të komunës, përveç nëse ky mandat i pushon në rastet e parapara me legjislacionin në fuqi.

8. Shqyrtimi i propozim – vendimit për themelimin e Këshillit Komunal për Siguri në Bashkësi;

Sylejman Mehulli, anëtar i kuvendit-lidhur me propozim-vendimin për themelimin e KKSB-së, kërkoi sqarime lidhur me pikën 1.16 të këtij propozim ku bëhet fjalë për z.Habib Mustafa, përfaqësues i Këshillit Lokal për Siguri në Bashkësi për fshatrat Strof, Beçuk, Gllavatin, Bivolak Zhilivodë, Prlluzhë dhe Mihaliq. Lidhur me këtë ai tha se nuk kemi informacione se i njëjti është i zgjedhur me vendimi si përfaqësues i këtyre fshatrave. Për më tepër i njëjti vite me radhë ka qenë i ngarkuar në pozita të ndryshme nga radhët e PDK-së dhe ai është zyrtar i PDK-së. Nëse kjo është kështu atëherë kjo nuk është një praktikë e mirë që këshillat e tillë të politizohen, andaj kërkoi që ai të zëvendësohet.

Pas shqyrtimit të kësaj pike të rendit të ditës kuvendi pas votimit me 18 vota “për”, 4 vota “kundër” vendosi me sa vijon:

1. Me këtë vendim, themelohet Këshilli Komunal për Siguri në Bashkësi në këtë përbërje:

- 1.1. Ferit Idrizi, Kryetar i komunës – kryesues;
- 1.2. Reshat Kovaqi, komandant i stacionit policor – anëtar;
- 1.3. Miradije Maloku, drejtoreshë për arsim – anëtare;
- 1.4. Maliq Ferizi, drejtor për mbrojtje dhe shpëtim – anëtar;
- 1.5. Edolind Vishaj, përfaqësues i FSK-së – anëtar;
- 1.6. Hadije Zuçaku, kryetare e Këshillit të prindërve të arsimit të komunës – anëtare;
- 1.7. Remzije Zekolli, zyrtare për barazi gjinore dhe të drejta të njeriut – anëtare;
- 1.8. _____, kryesues i Komitetit për Komunitete;
- 1.9. Shemsi Rrahimi, përfaqësues i Bashkësisë Islame në Vushtrri – anëtar;
- 1.10. Simor Çimburoviç, përfaqësues i Kishës ortodokse serbe – anëtar;
- 1.11. Banush Elezi, përfaqësues i Kishës protestante ungjillore – anëtar;
- 1.12. Milan Bojkovic, përfaqësues i komunitetit serb - anëtar;
- 1.13. Nermin Munishi, përfaqësuese e komunitetit turk – anëtare;
- 1.14. Sedat Durmishi, përfaqësues i komunitetit ashkali – anëtar;

- 1.15. Brendon Shaqiri, përfaqësues i komunitetit rom – anëtar;
- 1.16. Habib Mustafa, përfaqësues i Këshillit lokal për siguri në bashkësi për fshatrat: Bivolak, Zhilivodë, Gllavatin, Prelluzhë, Stroc, Beçuk dhe Mihaliq – anëtar;
- 1.17. Gjylsime Feka, përfaqësuese e Këshillit lokal për siguri në bashkësi, për fshatrat: Banjskë, Gojbulë, Sllatinë, Tërllobuq, Karaçë, Begaj, si dhe “Kalaja” Vushtrri – anëtar;
- 1.18. Ekrem Merovci, kryesues i Ekipit veprues për siguri në bashkësi – anëtar;
- 1.19. Branisllav Vuksanoviq, përfaqësues i Zyrës komunale për komunitete dhe kthim – anëtar;
- 1.20. Vildane Mulaku, kryetare e Shoqatës “Martirët e Lirisë” (OJQ) – anëtare;
- 1.21. Avni Deliu, përfaqësues i mediave – anëtar;
- 1.22. Hakif Kalludra, përfaqësues i komunitetit të biznesit – anëtar;
- 1.23. Isak Hyseni, përfaqësues i komunitetit të personave me aftësi të kufizuara – anëtar;

2. Kryesuesi dhe anëtarët e Këshillit komunal për siguri në bashkësi, detyrat dhe përgjegjësitë e tyre do t'i ushtrojnë në pajtim me Udhëzimin Administrativ të MPB-së për themelimin e KKSB-së.

3. Mandati i KKSB-së është i njëjtë me mandatin e anëtarëve të Kuvendit të Komunës.

4. Kryesuesi dhe anëtarët e KKSB-së, për pjesëmarrje në mbledhje do të kompensohen në bazë të legjislacionit në fuqi në Kosovë.

5. Në rast se anëtari / ja i/e KKSB-së nuk merr pjesë në tri mbledhje radhazi ose për çfarëdo sjellje ose veprim e komprometon funksionin efektiv të KKSB-së, me propozimin e kryesuesit të KKSB-së, Kuvendi i Komunës emëron anëtarin tjetër të këtij këshilli.

6. Ky vendim hyn në fuqi pesëmbëdhjetë (15) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe pas publikimit në faqen zyrtare të Komunës së Vushtrrisë.

9. Shqyrtimi i propozim – vendimit për emërimin e Komisionit Komunal të Aksionarëve në KRM ‘Uniteti’ Mitrovicë SH.A, njësia në Vushtrri;

Sylejman Mehulli, anëtar i kuvendit-kërkoj një pauzë prej 5 minutave për konsultim mes grupeve kuvendare.

Mentor Hasani, anëtar i kuvendit – në emër të grupit kuvendar të PDK-së, propozoi Galip Avdiun për anëtarë të Komisionit Komunal të Aksionarëve në KRM ‘Uniteti’ Mitrovicë SH.A, njësia në Vushtrri.

Bekim Zabrgja, anëtar i kuvendit-duke ju referuar Ligjit për Ndërmarrjet Publike neni 5 ku thuhet: Kur një komunë është aksionar në një NP Lokale, të drejtat e saj të aksionarit do të ushtrohet nga një Komision Komunal i Aksionarëve, i cili përbëhet nga (i) një anëtar i emëruar nga Kryetari i Komunës dhe (ii) dy anëtarë të tjerë të emëruar nga Kuvendi Komunal. Për këtë qëllim, Komisioni Komunal i Aksionarëve ka të drejtë të veprojë në emër të Komunës përkatëse dhe duhet të veprojë në përputhje me Ligjin për Shoqëritë Tregtare. Çdo Komision Komunal i Aksionarëve duhet, me

shumicë të thjeshtë votash, të vendosë se si do t'i ushtrojë të drejtat e aksionarit të komunës në një çështje të caktuar. Andaj në bazë të këtyre përcaktimeve ligjore askund nuk thuhet se anëtarët e këtij komisioni duhet të jenë nga grupet me të mëdha kuvendare, por nga kuvendi, në rastin konkret është duke u shkelur Ligji për Ndërmarrjet Publike.

Sylejman Mehulli, anëtar i kuvendit- në emër të grupit kuvendar të LVV-së, propozoi Refik Malokun, për anëtarë të Komisionit Komunal të Aksionarëve në KRM 'Uniteti' Mitrovicë SH.A, njësia në Vushtrri.

Pas diskutimeve lidhur me këtë pikë të rendit të ditës, kuvendi pas votimit me vota "unanime" vendosi me sa vijon:

1. Me këtë vendim emërohen dy (2) anëtarë të Komisionit Komunal të Aksionarëve në KRM "Uniteti" SH.A Mitrovicë - njësia në Vushtrri, si në vijim:

- 1.1 Galip Avdiu, anëtar i Kuvendit të komunës;**
- 1.2 Refik Maloku, anëtar i Kuvendit të komunës.**

2. Komisioni Komunal i Aksionarëve do t'i ushtrojë detyrat dhe përgjegjësitë e tij në pajtim me dispozitat e ligjit në fuqi për ndërmarrjet publike, si dhe Statutin e KRM "Uniteti" SH.A në Mitrovicë.

3. Mandati i Komisionit Komunal të Aksionarëve është i njëjtë me mandatin e tanishëm të Kuvendit të komunës.

10. Shqyrtimi i propozim – vendimit për emërimin e Komisionit Komunal të Aksionarëve në NPL 'Përparimi' SH.A, në Vushtrri;

Mentor Hasani, anëtar i kuvendit – në emër të grupit kuvendar të PDK-së, propozoi Mensur Kosumin për anëtar të Komisionit Komunal të Aksionarëve në NPL 'Përparimi' SH.A, në Vushtrri.
Adnan Lahu, anëtar i kuvendit-në emër të grupit kuvendar të LDK-së, propozoi Agim Bregajn për anëtar të Komisionit Komunal të Aksionarëve në NPL 'Përparimi' SH.A, në Vushtrri.

Pas shqyrtimit të kësaj pike të rendit të ditës, kuvendi pas votimit me vota "unanime" vendosi me sa vijon:

1. Me këtë vendim emërohen dy (2) anëtarë të Komisionit Komunal të Aksionarëve në Ndërmarrjen Publike Lokale "Përparimi" SH.A në Vushtrri, si në vijim:

- 1.1 Mensur Kasumi, anëtar i Kuvendit të komunës;**
- 1.2 Agim Bregaj, anëtar i Kuvendit të komunës.**

2. Komisioni Komunal i Aksionarëve do t'i ushtrojë detyrat dhe përgjegjësitë e tij në pajtim me dispozitat e ligjit në fuqi për ndërmarrjet publike, si dhe Statutin e NPL "Përparimi" SH.A në Vushtrri.

3. Mandati i Komisionit Komunal të Aksionarëve është i njëjtë me mandatin e tanishëm të Kuvendit të komunës.

11. Shqyrtimi i propozim – vendimit për themelimin të Komisionit përzgjedhës për zgjedhjen e drejtorëve dhe zëvendësdrejtorëve në Institucionet Edukativo Arsimore dhe Aftësuese Parauniversitare në Komunën e Vushtrrisë;

Adnan Lahu, anëtar i kuvendit-lidhur me këtë propozim –vendim tha se duhet respektohet kota gjinore, ndërsa deklaroi se janë pro këtij komisioni.

Refik Maloku, anëtar i kuvendit-tha se në fushën e arsimit është investuar mjaft shumë e sidomos në infrastrukturë shkollore, por ajo se çfarë e karakterizon dobësinë në procese shkollore është menaxhimi i shkollave. Kur jemi tek procesi i përzgjedhjes së drejtorëve dhe zëvendësdrejtorëve, mendon se është procesi më i rëndësishëm në menaxhimin e një institucioni arsimor dhe këtë duhet ta ketë parasysh kryetari dhe drejtori i DKA-së. Janë bërë shumë vite që përzgjedhje e drejtorëve është bërë në mënyrë të gabueshme. Për të qenë adekuat një drejtor ai duhet ti ketë disa karakteristika specifike për të që i suksesshëm: së pari ai duhet të jetë mësimdhënës i mirë i dëshmuar për 15-20 vite, në mënyrë që ai të jetë i mishëruar me procesin e arsimit, të mishërohet me praktikën që ndodhin në procesin mësimor gjatë trajtimit të një nxënësi, duhet të jetë i respektuar në kolektivin punues, të jetë i njohur si person që ka prirje në menaxhim. Andaj lidhur me këto ai duke përmendur një shkrim të bërë para disa muajsh, shtoi se ish kryetari i komunës, kishte vendosur drejtorë politikë nëpër shkolla, për çka edhe e kishte kritikuar. Në këtë kontekst vlerësoi se duhet pasur objektiv që të vendosen drejtor të cilët do ti qojnë proceset përpara në ngritjen e cilësisë së arsimit dhe jo drejtor të dëgjueshëm politikë e partiak. Tutje shtoi se dy anëtarët e propozuar sipas tij është kundër tyre jo pse ka diçka personale, është kundër Hashim Hajrizi sepse ka qenë njëri prej anëtarëve në komisionin e kaluar i cili ka bërë vlerësime që sipas tij, që nëse nuk janë të dënueshme me ligj, vlerësimet e tij kanë qenë jo etike, kjo për faktin se vlerësimi ka qenë asisoj që i njëjti kandidat për drejtor në dy shkolla ka marrë 60 pikë, ndërsa në shkollën që kanë dashur ta pranojnë ka marrë 80 pikë, dhe për këtë ky anëtar i komisionit ka dështuar të jetë parimor në vlerësimet e tij. Personi tjetër është Ruzhdi Igrishta, për të cilën prapë nuk ka asgjë personale, por nuk e di se a duhet të jetë patjetër drejtor që të jetë pjesë e komisionit, por se vlerësoi se ka edhe perona tjerë që kanë përvojë më të gjatë në menaxhim dhe për këto dhe gjëra të ngjashme ai propozoi që pjesë e komisionit të jetë profesori Sabit Kadriu, i cili ka një përvojë të gjatë dhe është një njeri mjaft korrekt dhe parimor, dhe në të njëjtën kohë është i mishëruar me procesin e arsimit.

Ilmi Azemi, anëtar i kuvendit-tha se komisioni i propozuar nga qeveria komunale është ndoshta prej komisioneve që ka treguar performancë të lartë në kontinuitet për gjatë shumë viteve. Hashim Hajrizi si zyrtar ligjor në DKA, gjithherë ka marrë vendime të bazuar në ligj, pretendimi se një kandidat për drejtor në dy shkolla të ndryshme ka marrë pikë të ndryshme është logjik dhe normal, sepse komisioni ka qenë i njëjtë por pyetjet nuk kanë qenë të njëjta, dhe vlerësimi ka qenë real dhe nuk ka pasur ankesa lidhur me këto procese, për çka tregon se kanë kryer detyrën me përgjegjësi të lartë. Ndërsa drejtori Ruzhdi Igrisha është drejtor shumë vjeçar në shkollën fillore në fshatin Maxhunaj dhe i njëjti ka treguar performancën më lartë të mundshme në menaxhimin e shkollave amë dhe dy shkollave në Vilancë dhe Pestovë, ku në të ardhmen duhet menduar që në këtë të fundit të kemi pavarësi në menaxhimin e asaj shkolle sepse edhe numri i nxënësve është i lartë. Andaj përfundimisht performanca e drejtorit në fjalë për vite ka qenë e shkëlqyer, dhe propozoi që të gjitha grupet kuvendare ta aprovojnë këtë propozim-vendim në mënyrë unanime.

Refik Maloku, anëtar i kuvendit-duke replikuar me parafolësin e tij vlerësoi se nëse pozita i ka bërë numrat për ta votuar këtë komision ,sepse këta anëtar janë të PDK-së dhe janë të dëgjueshëm atëherë votojeni. Por nëse nisemi nga parimi për të cilin foli më herët atëherë është tjetër gjë. Lidhur me kandidatin e propozuar nga ai z.Sabit Kadriu, njoftoi se ai nuk është në partinë e Vetëvendosje, dhe ceku se ai është meritore dhe cili ka përvojë të gjatë në arsim.

Ilmi Azemi, anëtar i kuvendit-tha se Partia Demokratike e Kosovës, asnjëherë nuk do të thirret në arrogancën e numrave, por ceku se anëtarët e komisionit janë profesional dhe që kanë treguar përgjegjësi të lartë në kryerjen e punëve.

Ymer Haradinaj, anëtar i kuvendit-kërkoi sqarim nga drejtoresha e arsimit, se cila është përgatitja shkollore e dy anëtarëve të propozuar të këtij komisioni dhe a kanë vlerësim të performancës brenda vitit të fundit kalendarik. Tutje shtoi se procesi i zgjedhjes së drejtorëve dhe zëvendës drejtorëve të shkollave në Komunën e Vushtrrisë, duhet të bëhet sipas legjislacionit në fuqi Ligjit për arsimin Parauniversitarë dhe Udhëzimin Administrativ Nr.151/2020 për Detyrat, Përgjegjësitë, Procedurat dhe Kriteret e Zgjedhjes së Drejtorit dhe Zëvendës drejtorit të Institucionit Publik Edukativo-Arsimor dhe Aftësues Parauniversitar, ku përcaktohen edhe parimet bazë siç janë: parimi i ligjshmërisë dhe depolitizimit, parimi i meritokracisë dhe kompetencës profesionale, parimi i transparencës dhe bashkëpunimit institucional, parimi i paanësisë mundësive të barabarta dhe mos diskriminimit dhe parimi i barazisë gjinore. Tek pika 1.7 thuhet se: kandidati duhet të sjellë dëshmi dhe dokumente si në vijim: dhe aty në mënyrë taksative përshkruhen një mori e kushteve dhe dokumenteve që duhet ti posedoj kandidati pjesëmarrës në konkurs, ndërsa tek pika 1.7.7. thuhet se: kandidati duhet ta nënshkruaj deklaratën në betim që vërteton se në tri vitet e fundit kandidati/ja nuk ka qenë në asnjë funksion udhëheqës në strukturat e partive politike. Dy anëtarë të komunës të cilët propozohen nga DKA, dhe miratohen nga kuvendi i komunës .Anëtar i parë duhet të jetë i punësuar në DKA dhe duhet të jetë kryesuese i komisionit, anëtar i dytë po ashtu i propozuar nga DKA mund të jetë ekspert i pavarur i arsimit, drejtor i institucionit arsimor me performancë të lartë, përfaqësuese nga këshilli i prindërve me kualifikim të lartë dhe ekspertizë në fushën e edukimit po ashtu pjesëmarrës gjatë këtij procesi duhet të jenë dy përfaqësues nga Këshilli Drejtues në cilësinë e vëzhguesve një prind dhe një mësimdhënës. Neni 6 pika 7 e Udhëzimit Administrativ nr.151/2021 përcakton anëtarët e MASH dhe DKA duhet të kenë së paku një kualifikim të barasvlefshëm me kërkesat për kualifikim të kandidatëve për pozitë të drejtorit/zëvendës drejtorit si dhe përvoja në arsim së paku tri vite. Nga të cekurat më lartë nuk e konteston propozimin për profesorin Ruzhdi Igrishta, por duhet pasur kujdes, dhe është mirë të dimë se cilat janë përgatitjet profesionale të këtyre anëtarëve të propozuar për komision, kjo për faktin se a do mund të ndodh që një anëtar i komisionit me përgatitje themelore universitare të intervistoj një kandidat për drejtor me titull master/magjistër apo doktor i shkencave në këtë drejtim duhet të kemi informata të sakta, nga drejtoresha e arsimit. Këto dhe parime tjera të lartë cekura duhet të jenë pika referuese, të punës së këtij komisioni që do shërbejnë për përzgjedhjen dhe për vendimmarrësit për emërimin e drejtorëve dhe zëvendës drejtorëve të shkollave.

Në fund të debati lidhur me këtë pikë të rendit të ditës, kuvendi pas votimit me 21 vota “për”, 6 vota “kundër”, 1 votë “abstenim” vendosi me sa vijon:

1. Me këtë vendim formohet komisioni për përzgjedhje për vendet e punës: drejtor dhe zëvendës drejtor, në shkollat fillore, të mesme të ulëta dhe të mesme të larta në Komunën e Vushtrrisë, me këtë përbërje:

- 1.1. Hashim Hajrizi, zyrtar ligjor dhe personel i DKA-së;
- 1.2. Ruzhdi Igrishta, drejtor i SHFMU "Rilindja" Maxhunaj
- 1.3 _____, përfaqësues i MASHT-it

2. Komisioni do t'i zhvillojë të gjitha procedurat për përzgjedhjen e drejtorëve dhe zëvendësdrejtorëve në Komunën e Vushtrrisë, konform Udhëzimit Administrativ nr.151/2021 për Detyrat, Përgjegjësitë, Procedurat dhe Kriteret e Zgjedhjes së Drejtorit dhe Zëvendësdrejtorit të Institucionit Publik Edukativo-Arsimor dhe Aftësues Parauniversitar.

3. Komisioni i cekur si në nenin 1 të këtij vendimi ka mandat për një vit shkollor.

4. Për zbatimin e këtij vendimi obligohen: Drejtorja e Arsimit dhe komisioni i lartcekur.

12. Shqyrtimi i kërkesës të Kryetarit të komunës për miratimin e nismës për ndryshimin dhe plotësimin e Statutit të Komunës;

Sylejman Mehulli, anëtar i kuvendit-tha se edhe mandatin e kaluar kemi pasur një nismë për ndryshimin dhe plotësimin e statutit të komunës, por që ka qenë një iniciativë e dështuar, andaj edhe tani konsideron se vetëm do të kemi humbje kohe, sepse do të jetë problematike gjetja e një ujdje të përbashkët, sepse zakonisht fillon me ndryshime kozmetike të statutit dhe përfundon tek tendenca kryesore e ndryshimeve për rritjen e numrit të drejtorive komunale, në një buxhet edhe ashtu të varfër. Prandaj në një situatë të tillë që jemi nuk e shohin që kemi një domosdoshmëri që akti më i lartë juridik i komunës të ndryshohet, prandaj janë kundër plotësim-ndryshimeve të tilla në këtë fazë.

Ilmi Azemi, anëtar i kuvendit-konsideron se nisma për ndryshimin dhe plotësimin e Statutit të Komunës, ka qenë e domosdoshmë edhe më herët, mirëpo për arsye subjektive nuk kishte mundur të procedohet. Kur flasim duhet ti referohemi fakteve, Statuti i Komunës ka mbet i pandryshuar që nga viti 2011, ndërsa Ligji për Vetëqeverisje Lokale dhe disa udhëzime administrative kanë pësuar ndryshime të mëdha. Më tej vlerësoi se ka nevojë të kemi ristrukturim të departamenteve komunale duke shtuar drejtori me qëllim të ngritjes së cilësisë së shërbimeve që ofrohen për qytetarët. Edhe nëse nuk shtohet numri i drejtorive komunale, prapëseprapë statuti ka nevojë të ndryshohet sepse edhe kuvendi nuk do të mund ta luaj rolin e vetë, sepse kemi ndryshime legjislative, andaj bërë thirrje që të përkrahet kjo nismë.

Ferit Idrizi, kryetar i komunës-propozimi dhe nisma për ndryshimin dhe plotësimin e Statutit të Komunës së Vushtrrisë, është nevojë e funksionimit të organeve të komunës, kjo marr parasysh se prej vitit 2011 nuk është ndryshuar ky akt. Andaj kushdo që do ishte në udhëheqje të komunës, do të fillonte një iniciativë të tillë dhe edhe ai në çfarëdo pozicioni do të përkrahet një nismë të tillë, por gjithësie do të kërkonte të ketë komision profesional prej qeverisë dhe prej kuvendit që janë të gatshëm të marrin përgjegjësi dhe lexojnë nenë për nenë dhe paragraf për paragraf. Statuti i Komunës duhet të ndryshohet sepse është nevojë e kohës dhe duhet të bëhet harmonizimi me ligjet dhe udhëzimet administrative dhe me qëllim të funksionimit sa më të mirë të organeve komunale. Andaj kërkoi nga kuvendi që të përkrahet kjo nismë dhe të formohet komisioni profesional për ndryshimin dhe plotësimin e statutit të komunës.

Në fund të debati lidhur me këtë pikë të rendit të ditës, kuvendi pas votimit me 20 vota "për", 5 vota "kundër", 1 votë "abstenim" vendosi me sa vijon:

1. Me këtë vendim miratohet nisma e Kryetarit të komunës për ndryshimin dhe plotësimin e Statutit të Komunës së Vushtrrisë 01Nr. 58/11, i miratuar më datë 28.4.2011.

13. Shqyrtimi dhe miratimi i vendimit për formimin e Komisionit për përgatitje të draftit të Statutit të Komunës për ndryshim dhe plotësim të Statutit të Komunës;

Mentor Hasani, anëtar i kuvendit – në emër të grupit kuvendar të PDK-së, propozoi Ilmi Azemi, për anëtar të komisionit për ndryshimin dhe plotësimin e statutit të komunës.

Adnan Lahu, anëtar i kuvendit-në emër të grupit kuvendar të LDK-së, propozoi Shkelzen Xhaferin për anëtar të komisionit për ndryshimin dhe plotësimin e statutit të komunës.

Sylejman Mehulli, anëtar i kuvendit- në emër të grupit kuvendar të LVV-së, propozoi Nasuf Aliun për anëtar të komisionit për ndryshimin dhe plotësimin e statutit të komunës.

Ferit Idrizi, kryetar i komunës-propozoi Ismet Gashin dhe Alban Tahirajn, për anëtarë të komisionit për ndryshimin dhe plotësimin e statutit të komunës.

Pas shqyrtimit të kësaj pike të rendit të ditës kuvendi pas votimit me vota “unanimi” vendosi me sa vijon:

1. Me këtë vendim formohet komisioni për ndryshimin dhe plotësimin e Statutit të Komunës së Vushtrrisë në këtë përbërje:

1.1. Ilmi Azemi, anëtar i Kuvendit (PDK);

1.2. Shkelzen Xhaferi, anëtar i Kuvendit (LDK);

1.3 Nasuf Aliu, anëtar i Kuvendit (LVV);

1.4 Alban Tahiraj, (drejtor i Drejtorisë për Gjeodezi, Kadastër dhe Pronë) dhe

1.5 Ismet Gashi, (udhëheqës i Zyrës ligjore).

2. Për zbatimin e këtij vendimi obligohet komisioni i cekur në pikën 1 të këtij vendimi, i cili ka për obligim që t’i hartojë ndryshimet statutare dhe të njëjtat duhet t’ia ofrojë Kuvendit të komunës për aprovim.

3. Komisioni i cekur në pikën 1 të këtij vendimi ka për detyrë të mbajë takime, dhe në përbërjen e tij duhet të zgjedh kryesuesin e komisionit dhe procesmbajtësin, ashtu që të evidentojë ndryshim-plotësimet e dispozitave statutare dhe të përgatitë draftin <Propozim-ndryshimet e Statutit bazë të Komunës së Vushtrrisë>.

4. Ky vendim hyn në fuqi pesëmbëdhjetë (15) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrrisë.

14. Shqyrtimi i peticionit të ish banorëve të fshatit Skoçan për përfshirje në buxhetin e vitit 2022, asfaltimi i rrugës që lidh fshatin. Skoçan me Vushtrrinë.

Sylejman Mehulli, anëtar i kuvendit-tha se si grup kuvendar e përkrahin këtë kërkesë të banorëve të fshatit Skoçan, për ndërtimin e rrugës në fjalë. Ai shtoi se është i vetëdijshëm se kjo rrugë ka një

gjatësi bukur të madhe, por duhet të fillohet të bëhet ndërtimi i asaj rruge qoftë edhe si projekt dy apo tre vjeçar.

Adnan Lahu, anëtar i kuvendit-në emër të grupit kuvendar të LDK-së, tha se e mbështesin peticionin e këtyre banorëve, dhe ceku se ky projekt do të mund të realizohet nga të hyrat e bartura. **Ferit Idrizi, kryetar i komunës**-tha se marr parasysh gjendjen financiare të komunës se si e kemi aktualisht, mendon që këtë vit të fillohet nga të hyrat e bartura, me rregullimin e tamponit dhe të jetë si projekt që vazhdon në vitin 2023 dhe 2024

Pas shqyrtimit të kësaj pike të rendit të ditës kuvendi pas votimit me vota “unanimi” vendosi me sa vijon:

Kuvendi i Komunës së Vushtrrisë në mbledhjen e jashtëzakonshme të mbajtur më datë 31 janar 2022, ka shqyrtuar peticionin e adresuar në emër të Fehmi Kasumit, përfaqësues i banorëve të fshatit Skoçan, lidhur me kërkesën për futje në buxhet të komunës, projektin – asfaltimi i rrugës që lidh fshatin Skoçan me Vushtrrinë, përkatësisht segmenti nga Begaj, pjesa e asfaltuar deri në fshatin Skoçan, në gjatësi prej 6 km, në ç’rast ka vendosur me sa vijon:

Projekti i cekur më lart do të futet në planifikim të buxhetit për vitet 2022-2023-2024, nga buxheti i komunës, nga të hyrat e bartura.

Në vitin 2022 do të fillohet me rregullimin e tamponit të rrugës. Ky projekt do të zhvillohet si projekt trevjeçar për shkak të kufizimeve buxhetore që ndodhet aktualisht Komuna e Vushtrrisë.

Obligohet Drejtoria për Buxhet dhe Financa e Komunës së Vushtrrisë që bëjë inkorporimin e këtij projekti në buxhetin e komunës.

15. Shqyrtimi i propozim-vendimit për lirimin nga pagesa të taksës për shërbimet e çerdheve publike në Komunën e Vushtrrisë;

Pas shqyrtimit të kësaj pike të rendit të ditës kuvendi pas votimit me vota “unanimi” vendosi me sa vijon:

1. Me këtë vendim lirohen nga pagesa e taksës për ofrimin e shërbimeve për fëmijët që marrin shërbime nga çerdhja publike.

2. Vendimi për lirimin nga obligimi i pagesës së takës për shërbimet e çerdheve publike, bëhet për prindërit, fëmijët e të cilëve marrin shërbime nga çerdhet publike, kjo masë aplikohet si rrjedhojë e rëndimit të gjendjes sociale të familjeve, si pasojë e pandemisë covid-19, e njohur si corona-virus.

3. Për zbatimin e këtij vendimi obligohen: Drejtoria për Buxhet dhe Financa.

4. Ky vendim hyn në fuqi shtatë (7) ditë pas publikimit në faqen zyrtare të Komunës së Vushtrrisë dhe fillon të prodhojë efekt juridik për muajt shkurt dhe mars 2022 dhe vazhdon deri në një vendim të ardhshëm të Kuvendit të Komunës së Vushtrrisë.

16. Shqyrtimi dhe aprovimi i deklaratës për mbështetjen e profesorit Lulzim Paci.

Ilmi Azemi, anëtar i kuvendit-në emër të komisionit ad-hoc kuvendar lexoj deklaratën në mbështetje të profesorit Lulzim Paci.

Lidhur me këtë pike të rendit të ditës kuvendi pas votimit me 22 vota “për” 1 votë “kundër” vendosi me sa vijon:

Kuvendi i Komunës së Vushtrrisë në mbledhjen e jashtëzakonshme të mbajtur më datë 31 janar 2022, pasi ka shqyrtuar propozimin e anëtarit të kuvendit z.Ilmi Azemi, për futje në rendin e ditës të mbledhjes, propozimin e tij lidhur me reagimet publike ndaj profesorit Lulzim Paci, miraton këtë:

DEKLARATË

Ne anëtarët e Kuvendit të Komunës së Vushtrrisë në cilësinë e përfaqësuesve qytetarë, kemi përcjell me shqetësim akuzat e pabaza ndaj profesorit z.Lulzim Paci, andaj jemi të bindur se reagimet dhe kërkesat absurde publike, kanë ardhur në mënyrë të rastësishme dhe pa u artikuluar drejt. Kërkesat dhe pretendimet ndaj Lulzim Pacit janë të paarsyeshme dhe të padrejta, kështu që ftojmë të gjithë akterët që të distancohen nga fyerjet ndaj profesorit Lulzim Paci, ftojmë gjithashtu të gjithë ata që kanë kritikuar profesorin pa bazë, të kërkojnë falje publike dhe të tërheqin fjalët denigruese, të cilat e kanë rënduar emocionalisht profesorin e nderuar Lulzim Paci, por edhe opinionin publik.

Kuvendi i Komunës së Vushtrrisë.

31 janar 2022

Mbledhja përfundoj në ora: 15:50

Bastri Duraku


Procesmbajtës

Melihate Basholli-Latifi




Kryesuese e Kuvendit